

東高城之西爲此山。自分水嶺至此。凡八百三十餘里。山凡一萬二千峰。巖嶽骨立。東臨滄海。杉檜參天。望如畫圖。有日出月出二峰。可見日月之出。內外山。共有百八寺。表訓、正陽、長安、摩訶衍、普德窟、楡帖。最爲名利云。○新羅敬順王。以國弱勢孤。謀舉士降高麗。王子曰。國之存亡。必有天命。宜與忠臣義士。收合民心自固。力盡而後已。豈宜以一千年社稷。一朝輕以與人。王曰。孤危若此。勢不能全。至使無辜之民。肝腦塗地。吾所不忍。乃遣使請降於高麗。王子哭泣辭王。徑歸此山。倚巖爲屋。麻衣草食。以終其身。○崔濫送僧序。深山窮谷。人迹罕得至。固宜有異物。於茲萃焉。故爲張道陵之學者。以某山爲第幾洞天。是某真君所治。於是慕道厭世。鍊養而不粒食者。往往栖息其中。以忘返焉。予雖惡其不近情也。以有我爾之殊。亦不甚與之辨也。極天之東。濱海有山。俗號楓岳。僧徒謂之金剛山。其說本諸華嚴之書。書有海東菩薩住處名金剛山之文。予未嘗讀是書。未知果此山耶。近有以普德菴僧所撰金剛山記。來示予者。就讀之。則皆不經誕說。無一足信者。於中云。佛金像五十三軀。自西域浮海。以漢平元始四年甲子。至山。因而立寺。夫佛法東流。始於漢明永平八年乙丑。而行東國。又始梁武大通元年丁未。其後乙丑有四百一年之久。苟信彼說。是中原寥寥未知有佛。六十二年以前。東人已爲佛立廟。其最可笑者。他如是也。雖然聞古學空之人。入此山中。勤勵志行。而證其道者。比比有之。蓋始此山距人境。不啻數百里之遠。而巖嶂壁立。所至皆千萬仞。懸崖絕壑。無菴廬可以庇身。無一席之士。可以蒔菜果而食。其居此。則非竄嵌竇巢樹顛。與鳥獸雜處。草木充飢者。不能一日留也。釋氏之法。使修其道。必試之忍勞耐苦。然後有得焉。故其師有雪山六年之行。然則忍學是法。有志勤修者。不入于山。亦無以有爲也。邇來不然。山中菴居。歲增且百。其大寺則有



報德、表訓、長安等寺。皆得官爲營葺。殿閣窮隆。彌漫山谷。金碧輝煌。眩奪人目。至如常住經費。典財有庫。典寶有官。負郭良田。遍于州郡。又以江陵淮陽二道年租。直入于官。盡勒輸山。雖值凶荒。未見蠲減。每遣使人。歲支衣糧油鹽之具。必視無闕。其僧大抵不隸。逃其民避其徭。常有數千萬人安坐待哺。而未聞一人有如雪山勤修而得成道者。復有甚者。誑誘人云。一觀是山。死不墮惡塗。上自公卿。下至士庶。携妻挈子。爭往禮之。除冰雪沍寒。夏潦淫溢。路爲之阻。遊山之徒。絡繹於道。兼有寡婦處女。從而往者。信宿山中。醜聲時聞。人不知恠。或有近侍啣命。馳驛降香。歲時不絕。而官吏畏勢。奔走埃命。供億之費。動以萬計。傍山居民。困於應接。至有怒且詈曰。山胡不在他境者。噫人之愛山者。爲菩薩住此也。而敬菩薩者。爲能福人於冥冥也。其冥冥之福。旣不可識。而髡首者。銜鬻是山。自圖溫飽。而民受其害。尙何言哉。是故予見士夫有遊山者。雖力不能止之。心竊鄙之。今佛者禪智師。有是山之行。因書予素畜智中而未吐者贈之。師旣爲浮屠。何入山之晚耶。山中如有人。爲予謝之。當必有是吾言者矣。○權近送僧序。金剛山在本國東海上。其形勝冠絕天下。故其名聞天下。予幼時。嘗聞天下之人。無不願其來觀。而嘆莫之得。至有垂其圖而禮之者矣。其嚮慕之勤如此。予幸生此國。距此山不數百里。繫縛名韁。奔走世利。曾不得一往觀之。然欲飄然高蹈之志。未嘗不往來於曾中也。丙子秋。予入中國。謁天子近耿光。帝親命題。使製詩二十餘首。其一則金剛山也。於是知茲山之名。果重於天下。予幼時之所聞。殆不虛也。乃恨平日不一往。如天之福。得反鄉國。必欲先往茲山。以償其素志。今旣得還矣。而繫縛猶夫前日。予之志亦未獲償之。一日有浮屠者懶菴。袖詩以來。得而閱之。則其遊金剛山送行之作也。予不覺撫卷而自嘆。予安得擺俗累追雲蹤。凌巔岼之險。



陟崔嵬之巔。脚踏千仞。目極千里。小丘涇隘塵世。瞰滄溟之浴日。襲天壤之瀨氣。想東海之魯連。希泰山之尼父。浩浩然自得。悠悠然忘歸。以盪我平生骨中之抑鬱也哉。吁人之欲觀茲山者衆矣。予之欲觀亦久矣。以不數百里之近。而過數十年之久。尙未得一寓目焉。則天下之人之欲觀而不得者。幾何人哉。其未得觀者。特閑忙遠邇之勢不同而然歟。抑有冥數存焉。俗物不得踐仙境歟。且又未知既觀者之所得。其皆同乎。其有不同者乎。師之所得。其又與衆人者同而已乎。倘後日之予或得一登覽焉。則予之所得者。又不知其將何如也。但恨予今之欲觀。而未得也。故因觀是卷。而益有感焉。懶菴。世族也。棄絃綺蒙縷。其貌清其行潔。予將以爲方外之友也。○河崙送僧詩跋。楓嶽固奇秀可愛。衲衣者棲息其間。石磴千仞。人跡罕到。心與境靜。而往往有得其道者。然其稱金剛山。則假藏經之說耳。藏經有說金剛山者。若曰。在東海中八萬由旬。一萬二千曇無竭。常住其中。則非楓嶽之謂矣。釋迦生西方成等正覺及涅槃。與中國之成周並時矣。自周而上。盤古氏以來。至于夏商。聖賢之衆。教化之美。可稱道者非一二。禹會塗山。執玉帛者萬國。武王伐商。不期而會者八百國。及既克商。封箕子于朝鮮。朝鮮則在東海之上。國土之多。事物之繁。可稱道者亦非一二。釋迦所說。多至萬軸。何無一語及於中國之事。而獨於東海之中金剛山之里數。曇無竭之名數。若是其詳歟。其他過去未來天堂地獄之說。亦皆甚詳甚悉。而於現在之說。都爲闕略。何其人所未知者。說之詳。而人所共知者。說之無所及歟。蓋皆設爲假辭。使人知所畏慕。而長其向善之念耳。然則楓嶽之見稱爲金剛山者。假中之假爾。今上人之去也。愛其楓嶽之奇秀歟。慕其金剛之假說歟。假之說一出。而舉世之人。奔走不已。予之欲辨者久矣。今因上人之請詩。既題其懷舊愛山之意。而繼之以此說。上人其參之。若曰。諸相非



相。真假皆空。則非予之所敢辨也已。○李穀詩。攬天雲色放神光。天子年年爲降香。一望平生心已了。不須深處坐繩床。○權近應制詩。雪立亭亭千萬峰。海雲開出玉芙蓉。神光蕩漾滄溟近。淑氣蜿蜒造化鍾。突兀岡巒臨鳥道。清幽洞壑秘仙蹤。東遊便欲臨高頂。俯視鴻濛一盪匈。○高麗田致儒詩。草木微生禿首髮。烟霞半卷袒肩衣。兀然皆骨獨孤潔。應笑肉山都大肥。○安軸詩。骨立峰巒劒戟明。居僧齋罷坐無營。如何山下生民類。瞻望時時蹙額行。

### 天磨山。

在長楊縣西。距府一百三十四里。

### 介吞山。

在府東二十六里。斷

### 髮嶺。

在天磨山。距府一百五十四里。諺云。俗人登此嶺。見金剛山者。思欲斷髮出世。故名。

### 鐵嶺。

在府北三十九里。有石城遺基。○李穀記。鐵嶺。國東之要害。

所謂一夫當關。萬夫莫開者也。故嶺以東江陵諸州。謂之關東。至元庚寅。叛王乃顏之黨哈丹等賊。奔北而東。自開元諸郡。闌入關東。國家遣萬戶羅裕等。領其軍防護鐵關。賊劫掠和登以西諸州人民。至登州。使登人覘之。羅公聞賊來。棄關而走。故賊如蹈無人之境。一國洶洶。人被其害。登山城入海島。以避其鋒。至乞師天朝。然後乃能殲之。今余所見鐵關之險。誠使一夫當之。雖千萬人仰面攻之。不可以歲月得入也。羅公真小膽哉。○金克己詩。巉巖高不極。巨勢鎮關東。頂迥侵天盡。跟深徹地窮。冬威春冽冽。暝色晝濛濛。鶴警峰腰露。猿號洞口風。頽崖飛雨黑。秀嶺落霞紅。下顧塵寰隔。前尋石磴通。攢巒擊戍堡。疊嶂抱靈宮。紫氣籠青峭。丹霏噴碧空。馬蹄懸樹杪。人影閃雲中。溜接星河浪。林分月桂叢。狐丘看堯岱。鸛垵視華嵩。鳳管吟難巧。蛟綃寫未工。鑿開煩力士。移厝笑愚公。眺聽皆殊特。誰知造化工。○安軸詩。巨嶺橫空半。東西路此分。登高笑前將。負險劫孤軍。絕澗冰和雪。危峰石戴雲。無人修古壘。天下但



崇文。○路入關門眼暫開。紅旗黑槊共徘徊。忽驚職是憂民寄。還愧身無濟世才。烟火里閭多索寞。草萊城塹久摧頽。可憐聚散邊鄉吏。猶具衣冠禮往來。

東坡嶺。

在水入縣。

距府八十八里。嶺底水出南流。至縣北十里。復入地中。至縣南復出。故因名爲水入縣。距本府九十里。

楸池嶺。

在和川縣東十九里。距府六十九里。極高險。

雙嶺。

在嵐谷縣三十里。

洒嶺。

在長楊縣北三十里。距府二百三里。

灰嶺。

在府北五十七里。

拜帖。

在金剛山西。距府一百六十四里。○

李穀東遊記。至正己丑秋。將遊金剛山。踰天磨嶺。宿山下長楊縣。蓐食登山。雲霧晦暝。人言遊楓嶽者。以雲霧故不見而還。比比有之。同遊皆有憂色。默有禱焉。距山五里許。陰雲稍薄。日光穿漏。及登拜帖。天朗氣清。山明如刮。所謂一萬二千峰。歷歷可數也。凡入此山。必由此帖。登帖則見山。見山則不覺稽顙。故曰拜帖。舊無屋。累石爲臺。以備憩息。至正丁亥。今資正院使姜公金剛。奉天子之命。來鑄大鍾。閣而懸之于帖之上。旁廬桑門。以主撞擊。屹然金碧。光射雪山。亦山門一壯觀也。

金剛臺。

在表訓寺北。石壁千仞。人不得攀緣。有

二黑鳥爲巢其上。

萬瀑洞。

在金剛山中。百道流泉。瀉出谷中。其狀非一故名。谷口有峰。居僧指爲玄鶴。

曰五人峰。

人言青鶴棲其隈。有一泓曰觀音潭。潭畔石崖。蒼

苔滑足。人皆挽藤蔓乃得過。其名曰手巾崖。石心有凹如杵臼。諺傳觀音浣悅處。至普德窟前。飛湍縈石。來觸崖窾。飛雪噴激。晴晝欲暝。石底水蔚如翠藍。又數步。怒瀑飛下斷岡。小者噴珠。大者散雪。雜而下者無數。曰珠淵。又有一石。形如龜伏潭中。曰龜潭。又有一潭。深不可測。曰火龍潭。其上有峰。曰獅子巖。

水帖。

在金剛山東。諺云人若號呼。必



陰雨故名。洞府深邃。歸路漸平。少骨多肉。數十里至榆帖寺。

望高峰。

即金剛山東峰。自松蘿庵過隔崖。崖如石欄。直垂鐵鎖。人得扶曳而上。諺云若有喧鬧。晴必有雨。

○成任詩。隔岩人語聞山蹊。雲雨須臾咫尺迷。下却數峰天已霽。晦明誰復測端倪。

萬景峰。

即金剛山西峰。又有白雲臺國望帖。皆山之巨峰。

毗盧峰。

即金

剛山主峰。有岩紋。久因嵐霧斑駁。凝如雪色。山名皆骨者以此。

末暉嶺。

在長楊縣西北三十五里。距府一百六十里。

梨峴。

在長楊縣東五十里。距府一百

七十

寒沙里坪。

出府西四十五里。

龍淵。

在府北二十九里。即楊根郡大淵之下流。

德津。

在府西一里。出和川縣入昭陽江。

鳴

潭。

在金剛山。諺云蛟時出害物。

【土產】

鉛鐵。

出府西愁非山。

磁石。

漆。弓幹桑。

出府東東坡嶺。

海松子。

五味子。紫草。

人參。

茯苓。

松蕈。

石蕈。

蜂蜜。

羚羊。

白花蛇。

訥魚。

餘項魚。

錦鱗

魚。

【烽燧】

介吞山烽燧。

南應金城縣歧城北山。東應和川縣餘伊破山。

餘伊破山烽燧。

在府東四十五里。東應楸池嶺。南應介吞山。

楸池嶺烽燧。

東應通川郡金欄城。西應餘伊破山。

所山烽燧。

在府西二十五里。北應咸鏡道安邊府鐵嶺。西應嵐谷縣北山。

嵐谷北山



烽燧。

在府西三十三里。南應雙嶺。北應所山。

雙嶺烽燧。

南應平康縣松峴。北應嵐谷縣北山。

【新增】

獐尾山烽燧。

東應楸池

嶺。西應

所山。

【學校】鄉校。

在府東一里。

【驛院】銀溪驛。

在府西五里。察訪。本道屬驛十九。豐田、生昌、直木、昌道、新安、龍潭、林丹、玉洞、乾川、瑞雲、山陽、原川、方川、含春、水仁、馬奴、富林、嵐

校、林川。○察訪一人。○金克己詩。崎嶇下鐵嶺。窈窕尋銀溪。澄流出洞口。一帶青玻璃。遇

石或狂吼。轟轟鳴鼓鞞。夾峯花灼灼。連汀草萋萋。晴嵐趁人去。十里斷馬蹄。忽看柳外驛。危

構聯芳堤。林深野鳥喚。樹密山蟬嘶。翛然坐岸幘。五月風淒淒。境閑却思睡。欹枕松檻西。俯

仰體生翼。天鷄尋故棲。伶俜葛裙女。索莫蓬鬢妻。出門共挽袖。初笑還悲啼。各脫無久瞻。回

轡何大稽。我時鑄一錯。驚喜前相携。是日雨初足。臨窓鳴竹鷄。驚起了無有。撫心空慘悽。因

知人間事。覺夢一樣齊。莫言得與喪。相去如雲泥。等爲呂翁枕。憂喜都是迷。如何夸毗子。鼻

息上千霓。迴頭唉

新安驛。

在府南三十里。

校生院。

在府西十一里。

遮山院。

在府東六十里。

【佛宇】普賢菴。

在金剛山。

都山寺。

在金剛山。○李穀記。海東山水名於天下。而金剛山之奇絕。又爲之冠。且以佛書有曇無竭。菩薩所住之說。世遂謂人



間淨土。天子之使。降香幣絡繹于道。而四方士女不遠千里。牛載馬馱。背負首戴。供養佛僧者。踵相躡也。山之西北。有嶺橫截峻險。若登天然。人之至此。必盤桓休息。地既僻居民絕少。或值風雨。病于露宿。至元己卯。雙城摠管趙侯。謀于山僧戒清。卽其要衝臨道縣。買地數頃。剏佛寺爲祝聖道場。春秋舟粟。以飯出入者。散其餘山中諸蘭若。資冬夏食。歲以爲率。故揭名都山。侯之經營是寺也。令其境內僧徒曰。爲浮圖者。吾知之矣。其不曰上報四恩。下濟三塗乎。若飢餐渴飲。絕學無爲者上也。勤勤講說。孜孜化誘者次也。髡而家居。逃賦而營產。斯爲下矣。僧而爲下。不惟佛氏之罪人。亦國家之游民也。爾旣不役於官。而不吾助者罰。於是衆髡且慚且喜。爭執藝事以來。斧者斧之。鋸者鋸之。樸斲之塗墜之。侯輸家粟以食之。徹屋瓦以蓋之。不借民力。不日成之。工旣畢。使請記其事。余雖不識趙侯。聞其賢久矣。凡爲事。當利於物而便於人。爲己而求福者末也。夫臨道。一山之要害。故營是寺。以便其出入者。雙城亦一方之要害也。推是心以行其政。其便於人民者必多矣。近有東南邊民。流入彼境。侯則詰責所由。拒而不納曰。爾無恒產。因無恒心。故流徙耳。人無恒心。焉往而能容哉。余於是益知趙侯之爲人也。敢不爲之記。

### 普德窟。

在萬瀑洞中。有觀音閣。鑿絕壁架板。立銅柱於外。以構小屋三楹於其上。拘以鐵鎖。釘于岩石。浮在空中。人登則搖。中置佛函。飾以珠玉。外施鐵

網。以防手摸。諺傳。高麗安原王時。僧普德所創。○李齊賢詩。陰風生岩曲。溪水深更綠。倚杖望層巔。飛簷駕雲木。

### 摩訶衍。

在萬瀑洞最深處。○李齊賢詩。山中日亭

午。草露濕芒屨。古寺

### 佛地菴。

在萬瀑洞。○成任詩。有客來投宿。無人解出迎。山圍最上地。僧誦大乘經。澗水何時歇。篝燈徹夜明。塵中泡幻夢。

無居僧。白雲滿庭戶。



還向此  
中醒。  
松蘿庵。

在萬瀑洞。兩庵相對。曰大小松蘿庵。庵下有古城。人言長楊守避亂入此。或云其守謀亂據此。未知孰是。庵東有大谷。百道飛泉瀉下。支分股別。渺

如素霓。峰巒崢嶸。岩石突兀。攢者如劍。利者如錐。聳者如手。攢者如齒。曲者如肘。橫者如臂。蒼翠紛敷。間現疊出。○成任詩。大松蘿對小松蘿。東井西臺世不多。兩箇禪僧相對坐。不

知空翠  
滴袈裟。

### 長安寺。

在表訓寺下。堂殿及佛像皆中國工人所造。○李穀碑。聖天子龍飛之七年。皇后奇氏。以元妃生皇子。既而備壺儀。居于興聖之宮。顧謂內侍曰。予

以宿因。蒙恩至此。今欲爲皇帝太子。祈天永命。非託佛乘。其何以哉。凡其所謂福利者。靡所不舉。及聞金剛山長安寺最爲殊勝。祝釐報上。莫茲地若也。越至正三年。出內帑楮幣一千錠。

俾資重興。永爲常住用。明年又如之。又明年如之。集其徒五百。施衣鉢作法會。以落其成。迺命宮官資政院使臣龍鳳。載本末于石。以詔方來。遂命臣穀爲之文。謹按金剛山在高麗東。距王京

五百里。茲山之勝。非獨名天下。實載之佛書。其華嚴所說東北海中。有金剛山。曇無竭菩薩。與一萬二千菩薩。常說般若者是已。昔東方人。未之始知而指爲仙山。爰自新羅。增飾塔廟。於

是禪龕遍於崖谷。而長安寺居其麓。爲一山之都會也。蓋剏於新羅法興王。而重興於高麗之成王。噫後法興四百餘年。而成王能新之。自成王至今亦將四百年矣。而未有能興復者。比丘宏卞。見

其頽廢。與其同志誓於所謂曇無竭曰。所不新茲寺者。有如此山。卽分幹其事。廣集衆緣。取材於山。鳩食於人。僦面雇夫。礪石陶瓦。先新佛宇。賓館僧房。以次粗完。而費猶不給。則又嘆

曰。世尊作祇園。孤獨側金。今豈無人。顧不遇耳。遂西游京師。事聞中宮。而高資政主之又力。故其成就如是。竊惟乾竺之教。與時興替。昔我世祖皇帝是崇是信。列聖相承而光大之。今上皇



帝繼志述事。尤致意焉。蓋聖人好生之德。佛者不殺之戒。同一仁愛。同一慈悲也。中宮之觀感。有所自矣。且古之施德於天下者。莫如五帝三王。垂教於後世者。莫如孔子。以今觀之。帝王之廟食者幾希。孔子雖有廟。而限於禮制。籩豆薦奠。皆有常數。其徒之食。僅取足焉。惟浮圖氏。其宮在夷夏者。碁布星列。殿陛之嚴。金碧之飾。視王者之居。香火服食之奉。視封邑之入。是其感動于人者。實深以廣。茲寺之興。宜也。凡爲屋以間計之。一百二十有奇。佛殿經藏鍾樓三門僧寮客位。至於庖湑之微。皆極其輪奐。像設則有毗盧遮那左右盧舍那釋迦文。巍然當中。萬五千佛。周匝圍繞居正殿焉。觀音大士千手千眼。與文殊普賢彌勒地藏。居禪室焉。阿彌陀五十三佛。法起菩薩翊盧舍那。居海藏之宮。皆極其莊嚴。藏經凡四部。其一銀書者。卽皇后所賜也。華嚴三本。法華八卷。皆金書。亦極其賁飾。至若舊有之田。依國法以結計之。千有五十。其在咸悅。仁義縣者。各二百。扶寧。幸州。白州。各百五十。平州。安山。各一百。卽成王所捨也。鹽盆在通州。林道縣者一所。京邸在開城府者一區。其在市廛爲肆儼人者三十間。凡其錢穀什器之數。有司之者。不載。自泰定間。重興檀越。如中政使李忽篤帖木兒諸家。列其名氏于碑陰。銘曰。有山露骨。嶰崑突兀。名金剛兮。貝書所著。菩薩住處。亞清涼兮。吹噓烟雲。輪困網緼。發神光兮。鳥獸其馴。蟲蛇其仁。草木香兮。釋子卓菴。梯空架巖。遙相望兮。長安精舍。居山之下。大道場兮。肇基羅代。屢其成壞。時不常兮。天啓聖神。世祖之孫。君萬方兮。德洽好生。煦濡含靈。慕空王兮。於惟睿后。體坤之厚。承乾剛兮。歸心身毒。取彼妙福。奉我皇兮。惟此福地。仙佛奧祕。紛產祥兮。一人有慶。天其申命。壽無疆兮。明兩作離。永固鴻基。與天長兮。后謂內臣。惟彼法身。其化彰兮。旣新其宮。宜紀其庸。俾無忘兮。有石峩峩。于山之阿。勒銘



章兮。○前人詩。曉霧難分跬步前。日高清明謝龍天。雲連山遠西南北。雪立峰攢萬二千。一見便知真面目。多生應結好因緣。晚來更向蓮房宿。溪水松風摠說禪。

表訓寺。

在萬瀑洞口。諺云。新羅僧能仁、神林、表訓等。創此寺。古碑。有元皇帝與太皇太后施錢帛之文。寺門右。又有刻石。元朝人梁載所撰常住分糧記。高麗侍中權漢功所書也。○成任詩。千岩

萬壑多烟嵐。一區曲折藏名藍。殿堂高低隱松杉。雲間一徑穿溪南。異境從來性所耽。况吾身上無朝衫。梅檀林下憩征驂。奇觀一一隨意探。夜深燈影照禪龕。竹窓袞袞聞僧談。洒然醒我幻夢

酣。釋然祛我平生慙。至味由來貴不凡。不隨時世爭甜甘。塵網拘人動如粘。頭邊霜雪空來添。名山苟不一來參。何處可解心中炎。徘徊浩歎至再三。山鳥助我啼喃喃。正陽寺。

在表訓寺北。卽山之正脈。故名。地界高迥。山之內外諸峰。一一盡觀。諺云。高麗太祖登此山。曇無竭現身石上放光。太祖率臣僚頂禮。仍剏此寺。故寺後岡曰放光臺。前嶺曰拜帖。又有真歇

臺。○成任詩。地迥正陽寺。秋晴真歇臺。雲山都在眼。塵世豈關懷。映日屏千疊。排空玉幾堆。貪看忘去路。倚杖更徘徊。知佛菴、金莊菴、善住

菴、神琳寺、天親菴、修善菴、開心菴、妙德菴、天德菴、圓通寺、眞佛

菴、獅子菴、傍有石如獅子。故名。妙峰菴、三藏寺。俱在金剛山。

【祠廟】社稷壇。在府西。文廟。在鄉校。義館嶺祠。在古城內。祀典。載小祀。春秋降香祝以祭。城隍祠。在義館嶺。



德津溟所祠。在德津岸東峯。春秋  
降香祝致祭。載小祀。厲壇。在府  
北。

【古跡】文登廢縣。在府東四十里。本高勾麗文見縣。一云斤尸波兮。新羅改今  
名。為大楊郡領縣。高麗顯宗移屬春州。後來屬。本朝因之。南山城。

在縣南十里。石築。周一千六  
百六十七尺。古有軍倉今廢。嵐谷縣北山城。石築。周八百八  
十四尺。今廢。和川縣古山城。在縣  
東五

里。石築。周一千  
八十四尺。今廢。長楊縣古山城。在縣東四里。石築。周  
九百五十二尺。今廢。義館嶺古城。石築。周一千

廢。古軼雲縣。金富軾云。本高勾麗管述縣。新羅景  
德王改名。為連城郡領縣。今未詳。古稀嶺縣。金富軾云。本高勾麗猪  
守峴縣。景德王改名。

為連城郡領  
縣。今未詳。熊林所。在府東  
三十里。北尺所。在長  
楊縣。天寶山古城。石築。周五千六百  
三十六尺。高三尺。

【名宦】【高麗】李惟伯。文宗二年。東北路監倉使奏。交州防禦判官李惟伯。繕理城池。修  
備器械。為諸郡第一。所部連城長楊吏民等言。惟伯勸農恤民。雖

秩滿當代。願見得借。王嘉之。付尙書吏部。李崑。為府使  
有遺愛。李混。忠宣朝。貶  
為牧使。

沔川人。成宗朝  
知府。以清白名。【新增】【本朝】朴三吉。



【烈女】 【高麗】 權金妻

史失其姓名。權金夜被虎搏。丁壯七八俱不敢救。妻抱其腰。據門限大叫。虎捨去。權金旋死。事聞。旌閭。

【題詠】 山好居人却厭多。

李穀詩。地偏過客應來少。云云。北嶺重關牢鐵鑱。南江一帶漾青羅。

雪滿關山飛鳥絕。

姜淮

伯詩。幾年辜負白鷗盟。身似官河水。上萍。云云。黃昏畫角閉荒城。

鐵嶺關高秋氣多。

李達衷詩。銀溪路遠夕陰早。云云。

【新增】 深林開

板屋。

成倪詩。歷盡崔嵬逕。斜穿亂樹間。云云。過客卸歸鞍。谷邃雲常暗。山高氣尚寒。京師知幾里。歸夢日漫漫。

### 鐵原都護府

東、至金化縣界三十二里。南、至京畿永平縣界四十三里。西、至同道漣川縣界四十三里。至同道朔寧郡界二十九里。北、至平康縣界三十二

里。距京都二

百二十一里。

【建置沿革】 本高勾麗鐵圓郡。

一云毛乙冬非。

新羅景德王。改鐵城郡。後弓裔起兵。

略取高勾麗舊地。自松嶽郡來都。修葺宮室。窮極奢侈。國號泰封。及高麗太祖即位。徙都松嶽。改鐵圓爲東州。成宗十四年。置團練使。穆宗八年罷之。顯宗九年改知州事。高宗四十一年。降爲縣令。後陞爲牧。忠宣



王二年。汰諸牧。改今名。降為府。本朝

太宗十三年。例改為都護府。

世宗十六年。自京畿移隸本道。【官員】府使、教授。各一人。

【郡名】鐵圓。鐵城。東州。陸昌。昌原。

【姓氏】【本府】崔、宋、張、金、柳、鄭、邢、辛、高、韓、曹、盧、安、

李、蔡、許、朴、芳。邦。續。

【山川】高岩山。

在府北四十里。弓裔時以為鎮山。

白嶽山。

在府東北三十五里。

水精山。

在府南十五里。

南山。

在府

南三十里。

曉星山。

在府西北三十里。

寶蓋山。

在府南十七里。

佛見山。

在府西四十里。

加乙磨峴。

在府西四十里。

栽松坪。

在府北四十五里。

大也蓋坪。

在府東十里。古稱古東州坪。黃茅極目。與栽松坪俱為講武場。我世宗曾狩于此。

砌川。

在府東二

十里。源出淮陽府鐵嶺。又南流入于京畿楊州北為大灘。兩岸皆石壁如階砌。故名。



【土產】磁石。漆。五味子。人參。松茸。蜂蜜。茯苓。地黃。白花蛇。錦鱗魚。訥魚。

【烽燧】所伊山烽燧。

在府西八里。東應平康縣吐  
冰山及珍村山。南應適骨山。

適骨山烽燧。

在府西四十六里。北  
應所伊山。南應京畿

永平縣

彌老谷。

【樓亭】孤石亭。

在府東南三十里。岩石竦立。東臨淵水。世傳新羅眞平王。高麗忠肅王。嘗遊  
此亭。○高麗僧無畏記。鐵圓郡南萬餘步。有孤石亭。巨岩斗起。僅三百尺。

周十餘丈。緣岩而上。有一穴。蒲伏而入。如屋宇。層臺可坐十許人。傍有新羅眞平王所留碑。  
却出穴登絕頂。盤陔如圓壇。荒蘚衣以鋪茵。青松環而張傘。又有大川。自巽而來。礫崖轉石。  
如衆樂俱作。至岩下瀦爲淵。臨視之兢戰可畏。如有神物居焉。其水西走一舍許南流。前後皆岩  
巒壁立。楓楠松櫟。雜生其上。清爽奇異。雖工文善畫者。殆難得其彷彿。予戊子秋。與山人萬  
行等尋之。嗒焉坐忘。不覺日之夕矣。於是發晚遊之嘆。旣記其狀。又以詩志之。蒼岩臨水聳亭  
亭。兩岸秋山展錦屏。薄暮松風清可耳。似聞仙子讀黃庭。○金良鏡詩。大初何人構此亭。山骨  
萬仞跨虛碧。身輕斗覺風生衣。步穩方知蘚梗屐。鶴邊松老虬髯蒼。鶴外霞飛魚尾赤。鐵原撫撫  
眞勝壤。玉樓金殿盡荆棘。漁樵指點感古今。覓句沉吟烏帽側。○李穀追次忠肅王詩。覆轍誰能  
後戒前。秦封遺跡舊山川。勸王  
遠狩非良策。只爲姦臣不畏天。

北寬亭。

在府北。○姜淮伯詩。塗炭當時困幾州。登臨懷古  
倍新愁。雕牆峻宇繁華盡。破礎頽垣寂寞秋。俯仰



乾坤多感慨。顧瞻山水是清幽。黑金原上千年地。禾黍離離惱遠遊。

【學校】

鄉校。在府南三里。本高麗太祖仕弓裔時舊宅。垣墻遺址尙存。

【驛院】

龍潭驛。在府西十里。○安軸詩。寄宿茅茨下。霜濃冽氣嚴。困來伸病脚。危坐撚疎髯。屋老塵栖壁。窓明月掛簷。心忙眠未穩。斗覺夜耿耿。豐田驛。

在府南

通化院。

在府東三十九里。

權化院。

在府西三十五里。

【佛宇】

石臺寺。在寶蓋山。唐貞元八年。有獵師李順石。見石佛于此而建寺。高麗閔漬有記。

地藏寺。

在寶蓋山。有李穡重修記。○李穡詩。游山如

啖蔗。最愛入佳境。雲望共無心。溪行獨携影。鍾魚林壑空。殿宇松杉冷。甚欲辨青纏。臨風更三省。

深原寺、聖住菴、知足菴、龍華

寺、雲隱寺。

俱在寶蓋山。

積石菴。

在高岩山。

【祠廟】

社稷壇。在府西。

文廟。

在鄉校。

城隍祠。

在府西二里。

厲壇。

在府北。

【古跡】

楓川原。弓裔所都。在府北二十七里。外城周一萬四千四百二十一尺。內城周一千九百五尺。皆土築。今半頽落。宮殿遺址宛然猶存。

孤石城。



在孤石亭傍。石築。周二千八百九十二尺。今廢。新堤處。在府南二十里。

【人物】【高麗】崔俊邕。

佐太祖。為功臣。俊邕五世孫。初名錫。擢魁科。歷揚華要。至太保門下侍郎同中書門下平章事監修國史上柱

國判尚書吏禮部事。諡譽肅。

崔惟清。

諱子。少孤。好學。睿宗朝登第。累遷至左司諫。出倅尚州。歷知

淑。鄭仲夫之亂。文臣皆被害。諸將素服惟清德望。戒軍士勿入其第。以至期功之親。俱免禍。生八子。四子登第。歲廩其母。

崔讜。

惟清子。少聰悟善屬文。明宗初。為正言。

官至中書門下平章事。乞退閑居。扁其齋曰雙明。與弟誥。及太僕卿張自牧。東宮侍讀學士高瑩中。秘書省白光臣。司空李俊昌。尚書玄德秀。守司空李世長。大司成趙通等。為耆老會。逍遙

自適。時人謂之地上仙。圖形刻石。傳於世。卒諡靖安。

崔誥。

讜之弟。以文學聞於世。恬淡寡言。不以門地自高。累遷至參知政事。神宗朝。以年高德邁。起拜太傅門下侍

郎同中書平章事判吏部事。既而引年致政卒。諡文懿。配享熙宗廟庭。

崔璘。

讜之孫。惟清曾孫。器局宏深。少不護細行。與豪俠子薄遊。酒間。年幾二十。始發憤讀書。康宗

朝登第。歷臺諫。官至門下侍郎平章事。卒諡文景。

崔宗峻。

誥之子。神宗朝擢魁科。高宗朝官至門下侍中。乞退。王不允曰。崔侍中終始一節。清廉奉國。豈循常例。遽

令謝事。賜几杖。

崔昱。

誥之孫。高宗朝登第。官至太傅中書侍郎平章事。致仕卒。

崔文本。

昱之子。忠烈初。拜承宣。歷版圖判書卒。姿貌魁梧。沉重有大臣體。



嘗有上國使。問於人曰。汝國中若此者幾人乎。  
崔坪。誥之孫。高宗朝登第。累遷樞密院副使。以伯父宗峻親嫌。不得入省。崔雍。惟清曾孫。高宗朝登第。累

遷典理佐郎。忠烈自太孫時。迎以為傅。及即位。進副知密直司事翰林學士致仕卒。雍聚學徒訓誨不倦。其門人為公卿者甚多。崔瑩。雍之孫也。風姿魁偉。膂力過人。初隸楊廣

道都巡問使麾下。屢擒倭賊。以武勇聞。紅巾之亂。與安祐李芳實等。收復京都。錄勳為一等。殺金鏞。逐德興君。討哈赤。破倭賊。誅林堅味。廉興邦。皆瑩之力也。瑩清白出於天性。賞賜

田民。固辭不受。然關於大體。不顧群議。決策攻遼。獲罪天子。門下府郎舍許應等。上疏論請。遂斬瑩。諫大夫尹紹宗論曰。功蓋一國。罪滿天下。世以為名言。至本朝。贈諡武愨。

【孝子】【高麗】太成吉。紅賊入寇。成吉負七十四歲母。得免其難。至死孝養無替。朝廷嘉之旌閭。

【題詠】山含故國千年恨。姜淮伯詩。云云。雲抱長空萬里心。自百二山河淪廢後。趙浚

詩。云云。半千。青山似畫圍平野。李孟昀詩。云云。蟬鳴喬木動新秋。李原詩。草沒古都明夕

照。依舊魚龍寂寞秋。徐居正詩。國破山河作一州。秦封遺跡使人愁。至今麋鹿來遊地。云云。斜日淡烟天共遠。落花飛絮水同悠。當時鏡識歸真主。可

笑弓王。事逸遊。【新增】觀心閣上草空沒。宗室深源詩。一龍飛出黑金州。垓下佳人暗結愁。興廢幾經殷甲子。是非都付晉春秋。云云。落筆階前雲



自悠。麋鹿不知弓裔恨。夕陽江畔謾優遊。

秋深落葉填金井。

權健詩。東州城下草離離。一望凄然感盛衰。到底神光無處覓。當時奇識有誰知。云云。月黑驚

磨上玉墀。衰衰興亡天亦老。江山如許要新詩。

千年城壘莽悠悠。

成侃詩。鐵水雄藩古邑州。客來無語謾含愁。風雲沛上飛揚日。烟燼咸陽慘悽秋。兩國興亡

俱寂寂。云云。弓王不鑑前車覆。付與姑蘇麋鹿遊。

### 金城縣

東、至淮陽府長楊縣界一百五里。南、至狼川縣界五十二里。至金化縣界十七里。西、至平康縣界三十七里。北、至淮陽府界五十六里。距京都三

百三十六里。

【建置沿革】本高勾麗母城郡。

一云也次忽。

新羅改益城郡。後改今名。高麗顯宗降

為縣。屬交州。睿宗元年。置監務。後陞縣令。高宗復為監務。又稱道

寧。本朝復為金城縣令。【屬縣】通溝縣。

溝一作口。本高勾麗水入縣。一云買伊。新羅改今名。為歧城郡領縣。高麗顯宗屬

交州。後來屬。

【官員】縣令、訓導。

各一人。

在縣北六里。



【郡名】母城。也次忽。益城。金壤。道寧。

【姓氏】【本縣】蘇、孫、申、盧、劉。崔。原。宋。慶。州。李。寧。州。黃。平。海。

鄭。襄。陽。【通溝】田、李、朴、林。金、徐。並。續。【歧城】朴、高、文。

金。續。朴。通。溝。許。平。康。【小水伊】尹、朴。

【山川】慶把山。在縣北二里。鎮山。赤山。在縣南二十里。白亦山。在縣北四十五里。車踰山。在歧城縣南五里。距縣

四十里。良水山。在通溝縣東北十里。距縣七十五里。雲峯山。在縣南二十五里。菩提津。在歧城縣北。距縣五

之下流。○姜希孟詩。泂泂碧江水。是名菩提津。玻瓈色自如。清淨無染塵。我來三月暮。兩岸花柳新。泛槎亂清流。鏡面生細鱗。俯照恠我面。却撫舟上身。分明兩箇我。我我其誰真。覓真即成幻。幻幻繁相因。會當離遠離。參見本來人。離世如兔角。此語驚迷倫。長嘯扣船舷。滿眼天地春。多慶津。在通溝縣西七里。距縣六十里。上里川。

在縣南二里。源出淮陽府嵐谷縣。入菩提津。



【土產】漆。人參。銅鐵。出縣南。石鐵。出歧城里。蜂蜜。海松子。爐鉗石。

鉛鐵。俱出縣北。茯苓。白花蛇。石葶。五味子。訥魚。餘項魚。錦鱗魚。

【烽燧】阿峴烽燧。在縣南十里。南應金化所伊山。北應仇乙破山。仇乙破山烽燧。在縣北二十三里。南應阿峴。北應歧城北山。

歧城北山烽燧。在縣北四十八里。南應仇乙破山。北應淮陽府介吞山。

【樓亭】映碧樓。在菩提津北岸。有柳思訥記。

【學校】鄉校。在縣西三里。

【驛院】直木驛。在縣北八里。瑞雲驛。在縣南二十九里。昌道驛。古稱熊壤驛。在縣北三十一里。○成任詩。蕭洒軒窓靜。秋來眼豁然。

溪流乘雨急。楓葉得霜鮮。烟繞村墟外。山橫几案前。沉吟聊寄傲。萬慮正堪宣。永豐院。在縣南六里。熊施院。在縣北十三里。菩提津院。

在縣北五十里。兜率院。在縣東七十五里。



【佛宇】月峰寺。在赤山。

【祠廟】社稷壇。在縣西。文廟。在鄉校。城隍祠。在北山。厲壇。在縣北。

【古跡】歧城廢縣。在縣北四十八里。本高勾麗冬斯忽郡。新羅改今名。至高麗初。降為縣來屬。小水伊所。在通溝。桶寺洞古

城。在縣南八里。石築。周七百二十五尺。今廢。

【題詠】秋入金城錦不如。李穀詩。云云。千崖萬樹得霜初。林間老屋流亡外。山上礪田賦稅餘。莫歎使華紛傳遽。惟嫌吏弊巧侵漁。閑遊似我猶相擾。深

愧淵明獨愛廬。礪确禾無壠。姜淮伯詩。云云。蕭條屋數間。秋高風落帽。山近露侵欄。庭樹迎霜赤。溪雲渡水寒。地偏堪屏迹。何必鹿門山。

楊口縣。東。至麟蹄縣界三十四里。南。至春川府界三十二里。西。至狼川縣界三十一里。北。至淮陽府界七十三里。距京都三百三十一里。

【建置沿革】本高勾麗楊口郡。一云要隱忽次。新羅改楊麓郡。高麗改楊溝縣。屬春

州。後改今名。睿宗元年置監務。以狼川監務來兼。本朝



太祖二年。還析之。

太宗十三年。例為縣監。【屬縣】方山縣。

在縣北三十里。本高勾麗三峴縣。一云密波今。新羅改三嶺。為楊麓郡領縣。高麗改今

名。屬淮陽府。本朝

【官員】縣監、訓導。

各一人。

世宗六年。復來屬。

【郡名】要隱忽次。楊麓。楊溝。

【姓氏】【本縣】柳、張、金。李、梁。並續。

【方山】崔、米、俞、田。

【山川】飛鳳山。

在縣北二里。鎮山。

頭陀山。

在縣北五十一里。

四明山。

在縣西三十六里。山頂有池。天旱禱雨。

兜率山。

在縣東四十里。

都里串峴。

在縣東十五里。

沙里串峴。

在縣東三十二里。

鋪遷峴。

在縣南三十里。路甚險阨。懸設棧道。

曲溪。

在縣東四十里。自飛鳳山東北。抱縣旋繞而流。還出于飛鳳山西北。至狼川入馬灘。

【土產】磁器。五味子。紫草。人參。茯苓。蜂蜜。石葦。海松子。羚羊。

白花蛇。訥魚。餘項魚。錦鱗魚。



【學校】 鄉校。

在縣南一里。

【驛院】 水仁驛。

在縣南三十五里。

含春驛。

在縣北五里。

都里串院。

在都里串峴下。

【佛宇】 頭陀寺。

在頭陀山。

深谷寺。

在兜率山。

觀音寺、清涼寺。

俱在四明山。

【祠廟】 社稷壇。

在縣西。

文廟。

在鄉校。

城隍祠。

在飛鳳山。

厲壇。

在縣北。

【古跡】 亥安所。

舊屬春川府。永樂甲辰年移屬。在縣北六十里。

飛鳳山城。

石築。周八百九十二尺。高六尺。

【新增】 【孝子】 【本朝】 高崇孝。

燕山朝遭母喪。時短喪法嚴。崇孝猶服衰。朝夕哀哭。以終三年。事聞。旌閭。

【題詠】 岡巒半回環。

金克己詩。紅暎未出海。白霧猶沉山。晨炊歛東鶩。道里尤險難。嶺棧穿峯帆。溪石透潺湲。崎嶇來翠麓。洞口漸寬閑。角聲與旆影。遙出喬

林間。始知邑中吏。迎我方過關。瞥見雪水縣。云云。桑麻四三里。接屋喬木灣。跨空起客館。金碧光爛熳。瑤林簇北苑。縹渺青烟鬢。玉蘂倚南砌。輕盈紅雪顏。松風颯滌暑。竹日工明姦。却疑是洞府。誰識非塵寰。使君青雲彥。玄首尙未鬢。尙憐柳壁客。霜鬢成枯管。瞭然回清眄。相視不我頑。東巖喚謝妓。四座羅妖嬈。圓哥送嫋嫋。妙舞回巒巒。初筵已畏我。發軔行班班。



稱觴忽報導。末禮還可刪。  
安能學兒女。別淚空自潛。

境靜心猶靜。

宋九贊詩。云云。  
人稀事亦稀。

**新增**

連村麥浪逐風生。

成侃詩。度壑穿雲緩轡行。樹林深處聽溪聲。天開沃野抱楊麓。山作奇峰拱四明。滿畝秧針分水種。云云。此間刀犢無人佩。布穀如何苦勸耕。

### 狼川縣

東、至楊口縣界四十五里。南、至春川府界二十三里。西、至金化縣界六十四里。北、至金城縣界五十六里。距京都二百九十七里。

【建置沿革】本高勾麗狴川郡。

一云也。尸買。

新羅改今名。仍為郡。高麗初屬春州。

睿宗元年。置監務兼任楊口。本朝

太祖還析之。

太宗十三年。例為縣監。【官員】縣監、訓導。

各一人。

【郡名】狴川。也尸買。

【姓氏】【本縣】張、程、宋、吉。高、崔、白、金、朴。

並來。

【山川】狴山。

在縣西一里。鎮山。

龍華山。

在縣南二十二里。亦見春川。

啓星山。

在縣西一十八里。

馬峴。

峴有二。一在縣南二



十九里。一在縣北。日山。在縣東三十一里。南津。出馬峴。經縣南一里。大利津。在縣東十二里。即馬灘下流。六十四里金化境。

楓川。在縣東二十七里。馬灘。在縣東四十六里。金城縣菩提津之下流。

【土產】漆。海松子。五味子。紫草。人參。茯苓。蜂蜜。羚羊。訥魚。餘

項魚。錦鱗魚。石葦。

【樓亭】南津亭。在南津北岸。勵志堂。在客館西。

【學校】鄉校。在縣西三里。

【驛院】方川驛。在縣東四十二里。原川驛。在縣南十五里。山陽驛。在縣北四十五里。大利院。在大利津岸。

【佛宇】成佛寺。在龍華山。啓星寺。在啓星山。

【祠廟】社稷壇。在縣西。文廟。在鄉校。城隍祠。諺傳。子母堂。母堂在縣北四里。子堂在縣西七里。厲壇。在縣北。



【古跡】龍華山城。

石築。周九百五十六尺。高二尺。內有三井。今半頽落。

狹山城。

石築。周三千十四尺。高四尺。今半頽落。

【題詠】青山是四隣。

金克己詩。古郡碧溪濱。云云。一條東湊路。千里北征人。

山似龍蟠地軸深。

崔府詩。晴川歷歷樹陰陰。

云。地卑春水漲。

柳觀詩。山近雲騰谷。乍陰還乍晴。云云。樹密夏風清。夜暗燈生暈。簷虛雨送聲。沉吟仍不寐。偏起古鄉情。

雲近衣裳濕。

李之直詩。云云。

風來夏簟清。

### 伊川縣

東、至平康縣界三十八里。南、至安峽縣界十四里。西、至黃海道新溪縣界三十五里。北、至咸鏡道安邊府界一百五里。距京都三百二十二里。

【建置沿革】本高勾麗伊珍買縣。

新羅改今名。

爲兎山郡領縣。

高麗顯宗九

年。屬東州。後置監務。本朝

太宗十三年。例稱縣監。自京畿來隸本道。【官員】縣監、訓導。

各一人。

【郡名】伊珍買。花山。

【姓氏】【本縣】司馬、李、孫、高、朱、芳、朴、邊、成、吳、崔、李。



平昌。咸。高。海。林。蔚。嚴。寧。鄭。玄。韓。金。崔。朴。並。安。陝川。州。珍。越。風。來。

【風俗】俗尙鬼。地志。

【山川】城山。在縣北二里。鎮山。葛山。在縣東北一百二十九里。玉谷山。在縣東三十七里。所伊山。在縣南十里。

古城山。在縣北九里。廣福山。在縣北六十里。山高險。又有岩石如城。周十五里。內有居民。檜拈山。在縣北十里。豆尼山。

在縣北三十一里。開蓮山。在縣北六十八里。達摩山。在縣東十五里。寺洞溫泉。在縣北九十九里。正統六年。我世宗命構行宮。

七年春。駕幸御之。其後爲火所焚。仇里項溫泉。在縣北八十里。古城津。在古城山下。卽德津下流。又西流爲安峽縣之祭堂淵。南川。

出玉谷山。經客館南。又東流入古城津。

【土產】漆。海松子。五味子。人參。茯苓。地黃。松蕈。石蕈。蜂蜜。羚羊。白花蛇。紫草。訥魚。餘項魚。錦鱗魚。



【樓亭】悅雲亭。

在客館東。○金守溫記。亭何在乎。在伊川。亭何景乎。在乎白雲。乖崖子停驂於縣旬有五日。及夫酷愛於雲。則朝而凌晨。暮而至昏。常在斯亭之上。

雲雖無心。若有媚於人者。夜則冥濛於溪壑之間。暨東方始明。則雲亦闢而爲散。乍離乍合。或東或西。引而爲長。則疋練拖於山腹。積而爲高。則峩冠戴於山頂。少焉日出東峰。祥光杲杲。炳然而明。黯然而陰。倏忽之頃。氣象萬千。望之變鬻。如可承攬。卽之微茫。無可摸索。以爲山澤之吹。噓歟。則卽人之呼吸也。安有出入之氣乎。以爲鬼神之變化歟。則卽人之運用也。安有形影之跡乎。乖崖子悅而樂之。換古詩一字曰。亭中何所有。嶺上多白雲。只可自怡悅。不堪持贈君。旣以諗縣監李君。以悅雲二字文亭之額。縣在高山巨水之間。雲爲斯亭之所對。則固然矣。然晴亦如是。雨亦如是。朝橫暮霽。無一日之無雲。使山皆有雲。則一縣皆雲矣。訊之父老。曰亭之南山。舊有蟄龍之湫。今爲樵牧所路而夷矣。則非龍雲也。或曰官舍之北。高峰特秀。卽縣望山也。山靈故山常含雲。則山之四方。皆必有雲。而獨亭之常起何也。是亦不然。不曰浮雲乎。大山之雲。觸石而生。膚寸而起。其興也無所自。其散也無所歸。浮游大虛間耳。何興散之可言哉。旁有童子問曰。雲果無所生乎。余對曰。生於生處。童子曰。何謂也。余曰。卽伊川所謂起於起處也。何與於亭乎。因書爲悅雲亭記。

【學校】鄉校。

在縣北  
三里。

【驛院】乾川驛。

在縣南  
四里。

廣德院。

在縣北  
五十里。



【佛宇】葛山寺。在葛山。小林寺、陽陰寺。俱在達摩山。

【祠廟】社稷壇。在縣西。文廟。在鄉校。城隍祠。在城山。厲壇。在縣北。德津祠。在縣北三十里。

每春秋本縣致祭。○金守溫詩。伊川之水漱萬壑。兩水來合山峯。人言其下龍所宅。沉沉水府深莫測。桴人續蔓欲窺瞰。但見大石如瓦屋。蔭以澄波之澹澹。安知下有大城郭。琉璃為宮水晶殿。珊瑚樹高開別院。馮夷河伯爭來朝。龍王華袞環佩搖。紅旗為雲赤幟雨。頃刻霈澤周下土。朝家祀典謹春秋。牲幣香潔兼庶羞。風霆漲處龍來響。祠宇翼翼臨江上。吾王千歲子孫億。雨暘以時豐百穀。

【古跡】東城。在縣東二十一里。石築。周八百七十七尺。高九尺。周音洞防墻。在縣北一百十里。北通安邊永豐縣。西臨大川。東壓大山。一夫當關。

可遏萬兵。昔人築墻防胡。遺跡尚存。城山古城。石築。周七百四十尺。高十一尺。古城山古城。石築。周三百六十尺。高五尺。

【烈女】高麗孫氏。翰林承旨奇田龍妻。年二十一。田龍入中朝不返。孫養姑惟勤。不二於心。朝廷嘉其節義。立碑以旌之。

【題詠】地瘠易年荒。金守溫詩。溪深頻雨漲。云云。崖傾飛泉懸半空。李穡伊川歌。典客郎君向山後。茅屋石田知幾畝。云云。路入



危巔磨北斗。石壁雲埋有子苔。玉井月照如船藕。往來處處逢野僧。談笑時時值林叟。居民淳朴供鷄黍。縣令蕭條具牛酒。雖然風俗近鄙野。幸是人情尙淳厚。我今病臥欲還鄉。每遇酣詒聊擊缶。門前誰復致生芻。筆下自知無薤白。眼花落井賀秘書。齒搖益脫韓吏部。欲從濂洛泝真源。直恐乾坤似豐部。只向殘年更料理。道德文章垂不朽。

### 平康縣

東、至金化縣界二十四里。至淮陽府界二十七里。南、至鐵原府界十五里。西、至伊川縣界六十里。至安峽縣界六十三里。北、至咸鏡道安邊府界八

十一里。距京都

二百六十八里。

【建置沿革】本高勾麗斧壤縣。

一云於斯內。

新羅改廣平。爲富平郡領縣。高麗顯宗

九年。改今名屬東州。明宗二年置監務。後爲金化監務所兼。恭讓王元年。還析之。本朝

太宗十三年。例稱縣監。【官員】縣監、訓導。各一人。

【郡名】平江。於斯內。廣平。斧壤。

【姓氏】【本縣】許、蔡、全、宋、朴、瓜、鄭、石。【史丁】李、宋、崔、



朴、全。新村同。

【風俗】俗尙鬼。地志。

【山川】重峰山。在縣南二十五里。長鼓山。在縣北十四里。彌勒山。在縣東十五里。竹林山。在縣北三十九里。

戲靈山。在縣北八十八里。青龍山。在縣北五十九里。新城山。在縣北十三里。栗枝山。在縣西二十五里。雪吞嶺。

在縣北九十里。有小路指安邊。山勢險阻。昔人築墻防胡。遺址尙存。俗號防墻。分水嶺。在縣北四十九里。白頭山之脈勢。到此分爲東西二支。○高麗金壇詩。杜鵑聲

裏但青山。竟日行穿翠密間。渡一溪流知幾曲。送潺潺了又潺潺。栽松坪。在縣南十五里。狄巖川。在縣西三十四里。榆津水。在縣北八

十里。源出雪吞嶺。入伊川縣塘。

【土產】漆。海松子。五味子。人參。茯苓。石葦。蜂蜜。羚羊。白花蛇。

納魚。餘項魚。

【烽燧】松峴烽燧。在縣東九里。南應吐冰山。北應淮陽府雙嶺。吐冰山烽燧。在縣南十五里。西應鐵原府所伊山。北應松峴。珍村



山烽燧。

在縣南五十九里。東應金化縣所伊山。西應鐵原府所伊山。

【驛院】丹林驛。

在縣北十五里。○金克己詩。秋聲颯爽動鄉心。馬首悲涼越客吟。一陣晚風溪畔路。飄飄黃葉舞疎林。○度整復經湍。秋曦上樹端。荻花風颺白。楓葉

露凝丹。邑少鳴桴警。田多擊壤歡。目窮孤鳥外。千里路漫漫。

玉洞驛。

在縣西四十里。

【新增】石橋院。

在縣北五里。

【佛宇】幽寂寺。

在重峰山。

圓寂寺。

在萬雲山。

【祠廟】社稷壇。

在縣西。

文廟。

在鄉校。

城隍祠。

在縣北二里。

厲壇。

在縣北。

【古跡】憇峴。

在縣西。弓裔游獵。嘗憇息於此故名。

甲川。

在縣西。世傳弓裔聞變。逃至川上。棄甲而走故名。裔自此遁于巖谷。信宿飢甚。按麥穗而食。為斧壤

民所害。

新村所。

在縣北五十九里。

史丁所。

在縣北六十里。

墨谷所。

在縣東北三十里。

榆林所。

在縣北九十里。

青

龍山城。石築。周一千四百六十尺。內有一井今廢。

城隍堂山城。

在縣北一里。石築。周九百二十二尺。內有一井今廢。

【人物】高麗蔡松年。

高宗時人。位至中書侍郎平章事。諡景平。姿端秀。性和平。能終始富貴。

蔡植。

松年之子。志操謇諤。元宗如蒙



古。扈從多所裨益。官至門下侍郎平章事。配享元宗廟庭。

忠烈王朝登第。由通禮門祇候。入遷為相。士林榮之。後封順天君。為人精巧。於文章技藝。皆盡其能。自

號中菴居士。所製紫霞洞曲。傳於世。

蔡漢老。恭愍朝為政丞。

【新增】本朝 蔡忱。再登第。官至大司憲。

【題詠】雲雨閉江城。

姜淮伯詩。星霜驚歲月。云云。

秋晚平康夜。

崔脩詩。云云。無端百感生。陰蛩喧冷砌。風葉戰寒城。

蓬華

餘殘戶。

金禮蒙詩。駸駸渡荒野。林際白烟生。云云。茅茨有小城。

【新增】黑原連邑壤。

金守温詩。歷歷撫遺跡。悠悠勞此生。云云。弓裔有王

城。錦獸遊文藪。銅駝立晉荆。興亡感慨意。俯仰古今情。

雲低弓裔城。

成倪詩。群山忽橫斷。曠野悲風生。雪滿東州路。云云。甲溪飲麋鹿。憩嶺荒榛荆。懷古意

不歇。感慨多遺情。

山危臨水斷。

前人詩。洞壑繚而曲。茅茨夾澗阜。云云。巖峻抱松高。倏忽斜陽暮。艱關去路遙。每懷心靡塩。不惜一身勞。

透迤

回綠水。

閔壽千詩。云云。岌嶮帶黃阜。長道知身倦。奇遊覺眼高。寅賓清旭近。瞻戀喬雲遙。効力思酬眷。吾生亦太勞。

### 金化縣

東、至金城縣界三十六里。南、至狼川縣界三十一里。西、至鐵原府界三十里。北、至平康縣界二十六里。距京都二百八十三里。

【建置沿革】本高勾麗夫如郡。新羅改富平郡。高麗顯宗九年。改今名屬東



州。仁宗二十一年。置監務。本朝

太宗十三年。例稱縣監。【官員】縣監、訓導。各一人。

【郡名】夫如。富平。花山。

【姓氏】【本縣】李、白、成、鄭、韓、宋、楊、陽、京、朴、陳、柴、梁、

吳、安、盧。

【形勝】峽東大江。  
姜淮伯詩。峽東大江成險阻。民依薄土忍艱難。

【山川】五申山。在縣北十三里。鎮山。將之山。在縣西二十七里。三申山。在縣西十里。燈山。在縣北二十一里。

阿吾峴。在縣北四里。萬深山。在縣東三里。佛頂山。在縣東三十一里。忠峴山。在縣東三十六里。餘波山。在縣

北四十四里。水于山。在縣北三十七里。末訖川坪。在縣北二十五里。馬峴。在縣東二十九里。大聖山。在縣南二十四里。

丹巖。在狼川金城之境。距縣十三里。路旁有峰。成絕壁。其高千仞。鳥不得飛攀。石色微丹。故名。南大川。在縣南五里。方洞川。在縣東二十六



里。與南

大川合。

【土產】石鐵。

出方洞川。

漆。海松子。五味子。人參。茯苓。安息香。羚羊。白

花蛇。錦鱗魚。餘項魚。蜂蜜。石葦。[新增]綠礬。

出縣北。

【烽燧】所伊山烽燧。

在縣北十里。東應金城縣阿峴。西應平康縣珍村山。

【宮室】客館。

李石亨記。金爲縣。自高勾麗爲夫如郡。後隸新羅。號爲富平。迨高麗顯宗。始稱金化。而我朝因之。縣之來久矣。古館不知構於何代。歲久頽圯。地且湫

隘。爲守者每欲起廢。而力未暇。歲甲子。黃侯永。來理于茲。政修弊祛。治化大成。則屬父老群吏而謀之曰。爾邑。道于嶺東北者。皆由此。賓旅旁午。而公館隘陋。實爾輩之恥也。予欲新之。恐煩民力。倘有能體吾意。出己力而就者。吾當永復爾子孫徭役。有前縣令張廉。欣然進曰。吾家世居茲邑。吾父江陵府使思俊。嘗納賦獲於官。至今爲公家役。吾父爲公家心至矣。吾夙夜惟未繼先人之志是懼。況明府有命。敢不承乎。於是迺自伐木陶瓦。鳩工庇事。卜地于舊館之北。自戊辰七月始事。至今年十月而斷手。厥勢面陽。廳堂廊廡。莫不備具。丹雘旣訖。華不過侈。儉不至陋。甚可美也。昔之善役民者。言其易使曰子來。言其易成曰不日。然此官役其民。而民迺樂成其事也。今黃侯不役民力。而民自竭其力。官得其成。而民且得其利焉。尤有



可稱者矣。嗚呼自高勾麗至于今。宰於是邑者幾許。至黃侯而迺成。民於是邑者幾許。賴張君而得就。豈非物之興廢。自有其數。人之遭遇。亦自有其期乎。予於戊辰冬。謁告歸鶴城。來于斯得聞顛末。今黃侯又走書於予而求記。辭不獲。聊志其梗概云。

【學校】 鄉校。在縣西二里。

【驛院】 生昌驛。在縣南四里。  
【新增】 寶德院。在縣南六里。

【佛宇】 普賢寺。在大聖山。  
水泰寺。在五申山。  
三申寺。在三申山。

【祠廟】 社稷壇。在縣西。  
文廟。在鄉校。  
城隍祠。在山城中。  
厲壇。在縣北。

【古跡】 城山城。在縣北四里。石築。周一千四百八十九尺。高四尺。  
新化驛。古址在縣南二十五里。  
炭項所。在縣東二十里。

馬峴所。在馬峴下。

【題詠】 古郡依深洞。金克己詩。云云。官閑白日餘。山蟬吟寂寞。野燕舞婆娑。逼檻垂丹菓。連廳長綠莎。隔墻殘隱映。烟起是人家。  
山圍古縣



增秋氣。

李穀詩。云云。風打疎林助雨聲。夜半夢驚仍不寐。計程纔過鐵原京。

桑柘蕭條有幾家。

成石因詩。山川勃鬱無平地。云云。太守自言

爲郡樂。吏民

雖少客來多。半夜月明聞鶴聲。

禹承範詩。小庭葉落無人迹。云云。

### 安 峽 縣

東、至平康縣界三十四里。南、至京畿朔寧郡界十五里。西、至黃海道兎山縣界十四里。北、至伊川縣界四十五里。距京都二百六十里。

【建置沿革】本高勾麗阿珍押縣。

一云窮岳。

新羅改今名。爲兎山郡領縣。高麗顯

宗九年。屬東州。睿宗九年置監務。本朝

太宗十四年。合于京畿朔寧郡。號安朔郡。十六年。還析爲縣監。

世宗十六年。隸本道。【官員】縣監、訓導。

各一人。

【郡名】阿珍押。窮岳。安朔。

【姓氏】【本縣】許、孫、尹、芳、耿。

吳。信州。

劉。公州。

裴、柳、徐。並來。

【風俗】閭井相保。

李揚詩。參差閭井常相保。爲聞朱陳幾世孫。

葛天民俗。

許誠詩。葛天民俗獨遺存。耕鑿能傳子及孫。



【山川】萬景山。在縣北二里。鎮山。八峰山。在縣北十六里。高巖山。在縣東二十里。橋谷山。在縣北三十九里。

鑰達嶺。在縣北二十里。即八峰山西嶺。藤葛洞。在縣北十五里。豬仇里灘。在縣西十二里。出平康縣分水嶺。又西流入于浦里津。

祭堂淵。在縣西十二里。出咸鏡道安邊府永豐縣老伊峴。即臨津之源也。岩上有祭堂遺址。高諺傳。麗時。韃靼兵入寇至此。望見騎兵萬餘羅列。不敢進。以此構堂祠之。天

旱禱雨。有應。浦里津。在縣西九里。即祭堂淵下流。又南流入黃海道兎山縣。為東大川。

【土產】青石。出豬仇里灘石壁。玉燈石。出藤葛洞。石鐵。出縣東奴隱洞。性剛易折。漆。海松子。五味

子。人參。茯苓。石葦。蜂蜜。羚羊。白花蛇。訥魚。餘項魚。

【學校】鄉校。在縣西一里。

【佛宇】岩泉寺。在萬景山西。山之絕頂岩間。有泉湧出。雖大旱不渴故名。深谷寺。在萬景山東。修道寺。在八峰山。

【祠廟】社稷壇。在縣西。文廟。在鄉校。城隍祠。在縣南二里。厲壇。在縣北。



【古跡】 萬景山城。

石築。周一千四百三十四尺。高八尺。今半頽落。

南山城。

在縣南五里。石築。周一千九百六十五尺。內有一井今廢。

【人物】 【高麗】 孫冠。

文宗朝擢第。官至右僕射參知政事。爲人清純樸古。以文學名。

【題詠】 傍山臨水數家村。

許操詩。云云。相見衣冠古禮存。終歲力田難事育。未知何計養兒孫。

月明琴閣撫桐孫。

桓 裴

詩。人靜訟庭

無箇事。云云。



荆豆滿江  
咸鏡道

東抵豆滿江

東南抵

江入海

甲片甲

安道界

西抵平安道界

西南抵江



承大漢

承大漢



新增東國輿地勝覽卷之四十八

咸鏡道

本高勾麗之地。高麗成宗十四年。分境內爲十道。以和州、溟州等郡縣。爲

朔方道。靖宗二年。稱東界。

與北界  
爲兩界。

文宗九年。稱東北面。後咸州迤北。

沒於東女真。睿宗二年。遣尹瓘、吳延寵擊逐之。自咸州至公嶮鎮。築九

城爲界。立碑先春嶺。明宗八年。稱沿海溟州道。高宗四十五年。元兵來

侵。龍津縣人趙暉、定州人卓青。叛殺兵馬使愼執平。以和州迤北。附于

元。元置雙城摠管府于和州。以暉爲摠管。青爲千戶。元宗四年。稱江陵

道。恭愍王五年。遣樞密院副使柳仁雨。攻破雙城。收復和、登、定、長、

預、高、文、宜州。及宣德、元興、寧仁、耀德、靜邊等鎮。前此朔方

道。以都連浦爲界。築長城。置定州、宣德、元興三關門。皆沒于元。凡

九十九年。至是始復之。遣壽春君李壽山。定疆域。復號東北面。又稱江



陵朔方道。九年稱朔方江陵道。至恭讓王時。始與江陵道分。而自為一道

本朝

太祖朝。拓地至豆滿江。置孔、鏡、吉、端、青、洪、咸七州。

太宗十三年。以管內有永興、吉州。改永吉道。十六年。降永興為和州牧。

陞咸州為咸興府。置觀察使本營。乃改成吉道。

世宗朝。又置會寧、鍾城、穩城、慶興等四邑。

睿宗元年。以李施愛叛于吉州。降吉州為縣。

成宗元年。以咸興從亂殺觀察使。降為郡。移本營於永興府。改永安道。

殿下四年。復咸興府。移觀察使營。遂改今名。領府一。大都護府一。都護

府十二。郡四。縣四。【官員】觀察使。一人。兵馬節度使。三人。一南道。一北道。一觀察使兼。

水軍節度使。三人。一觀察使兼。一南北節度使兼。【新增】今上四年。兵馬節度使。一人。北道。

革南道所隸浪城、道安兩浦。因革南道節度使兼水軍。

【新增】今上七年。甲山府。都事。一人。兵馬評事。二人正六品。一北道。一南道。審藥。再被寇。並設南道虞候。



三人。一觀察使。  
二南北節度使。  
檢律。一人。

### 咸興府

東、至洪原縣界七十里。南、至定平府界二十七里。西、至平安道江界府界二百八十里。北、至三水郡界二百十里。至北青府界一百七十五里。距

京都八百六

十八里。

【建置沿革】本高勾麗舊地。久爲東女真所據。高麗睿宗二年。命尹瓘等擊

逐女真。三年置咸州大都督府。號鎮東軍。築城。徙南界丁戶一千九百四十八以實之。四年撤城。以其地還女真。後沒於元。稱哈蘭府。隸于雙城。

恭愍王五年。命我

桓祖。攻破雙城。收復舊疆。爲知咸州事。尋改萬戶府置營。聚江陵、慶

尙、全羅等道軍馬防戍。十八年陞爲牧。本朝

太宗十六年。改今名。陞爲府。爲觀察使本營。置土官。

世祖十三年。府人聽李施愛指嗾。殺觀察使守令等。

成宗元年。降爲郡。革土官。移觀察使營于永興府。



殿下四年。復舊。【鎮管】大都護府一。永興。都護府一。定平。郡一。高原。【官員】

府尹。觀察使兼。判官、教授。各一人。【土官】【都務司】都務。一人正五品。○自都務下至攝事。官品。諸邑

同。勸簿。一人從六品。管事。一人正八品。【典禮署】掌簿。一人從五品。典事。一人正七品。給事。

一人從八品。攝事。一人從九品。【諸學署】勸簿、管事、攝事。各一人。【戎器署】【司倉署】

【營作署】並同諸學署。【收支局】掌事。一人從七品。攝事。一人。【典酒局】給事、攝事。

各一人。【司獄局】攝事。二人。【四部】仁興、禮安、義興、智安。攝事。各二人。○以上係東班。觀

同。【鎮北衛】勵直。一人正五品。○自勵直至副勵勇。官品諸衛同。勵果。二人正六品。副勵果。二人從六品。勵正。

二人正七品。副勵正。二人從七品。勵猛。三人正八品。副勵猛。三人從八品。勵勇。三人正九品。副勵勇。三人

從九品。○以上係西班。節度使以本道人擬啓。平安道同。



【郡名】咸州。哈蘭府。咸平。鎮東軍。咸山。

【姓氏】【本府】文、李、韓、延、趙、玄、金、朴、崔、徐、禹、盧、尹。

魏、黃。並來。朱。投化。

【風俗】淳樸愚直。以馳馬彎弓為德。動之以利。妄為然諾。並李尹孫鄉校記。尙巫

祀。郡籍。勤儉强悍。地志。厥土多瘠。風氣早寒。勤儉强悍。一道州郡。率皆類此。長轂車。俗好用長轂車與藩車。他郡縣同。

【形勝】城邑宏壯。興王舊地。並李石亭聞韶樓記。

【山川】城串山。在府北二里。鎮山。山腰有小泉。雲起即雨。○恭愍王時。我太祖討納哈出。乃分三軍。左軍由城串山即是。麒麟山。在府北九

十里。人登山頂喧譁。則雲霧迷路。德山。在府東北四十五里。我太宗朝。甘露降于是山。雲住山。在府東二十里。大白亦山、小

白亦山。俱在府北一百五十三里。二山望之皆白。故諺稱白亦。牛頭山。在府東四十里。五峯山。在府北三十里。赴戰嶺。



在府北一百四十里。咸關嶺。在府東七十里。車踰嶺。在府東北七十三里。其嶺南曰咸關。北曰車踰。二嶺相距二十餘里。○咸關嶺。又見洪原縣。

歸州洞。在府東十里。兔兒洞。在府北九十里高遷社。○幸禍時。沈德符擊倭于大門嶺敗績。賊勢益熾。太祖請往擊之。至咸州。部署諸將。營中有松在七十

步許。太祖召軍士謂曰。我射第幾枝第幾箇松子。汝等觀之。即以柳葉箭射之。七發七中。皆如所命。軍中皆蹈舞歡呼。明日直指賊所。屯兔兒洞。伏兵於洞之左右。賊衆先據洞內東西山。

遙聞螺聲大驚曰。此李碑礮螺也。太祖率上護軍李豆蘭、散員高呂、判衛寺事趙英珪、安宗儉、韓那海、金天、崔景、李玄景、河石柱、李柔、全世、韓思友、李都景等百餘騎。按轡徐行過其

間。賊見兵少行緩。不測所爲。不敢擊。東賊就西賊爲一屯。太祖登東賊所屯處。據胡床。令軍解鞍息馬。久之將上馬。百許步有枯槎。太祖連射三矢皆正中之。賊相顧驚服。太祖令解

倭語者呼謂曰。今主將。卽李萬戶也。汝其速降。否則悔無及矣。賊會對曰。唯命是從。方與其下議降未定。太祖曰。當因其怠擊之。遂上馬。使豆蘭、呂、英珪。引致之。先鋒數百追來。

太祖陽被逐。自爲殿。退入伏中。遂回兵親射賊二十餘人。莫不應弦而斃。與豆蘭、宗儉等。馳擊之。伏兵且起。於是太祖身先士卒。單騎衝突賊後。所向披靡。出而復入者數四。手斃賊徒

無算。所射洞徹重甲。或有一矢而人馬俱徹者。賊徒奔崩。官軍乘之。呼聲動天地。僵尸蔽野塞川。無一人得脫者。是戰也餘賊入千佛山。亦盡擒之。千佛山。在府西北

九十。白雲山。在府西六十三里。中峯山。在府西二十五里。薛列罕嶺。在府西二百八十里。詳見平安道江界府。松洞嶺。



在府東四十五里。草黃嶺。在府北一百十里。距德山洞。在府東四十里咸關車踰二嶺之南。我太祖與納哈出。遇於此。擊走之。踰咸關。

車踰二嶺幾殲。委舍音洞。在府東北二十五里。我太祖駐兵于此。咸興坪。府之東西南皆大野。俗謂之咸興坪。納哈出陳于此。

太祖單騎突進試賊。賊驍將三人並馳直前。太祖從後射之。皆應弦而倒。轉戰引至要衝。左右

伏俱發。合擊大敗之。納哈出知不可敵。收散卒遁去。獲銀牌銅印等物以獻。東北鄙悉平。海。在府南三十里。城川江。在府西二里。其源有

歧嶺。一出平安道熙川郡境。合流經府西北哈蘭洞。歷城南至都連浦。入海。都連浦。古作都麟。在府南三十五里。有牧場。古長

都連浦。在府南四十里。花島。在府南四十五里。種竹。松島。在府東八十五里。即海墘也。湖連川。在府東八里。

加乙罕川。在府西十八里。微塵浦。在府南三十里。

【土產】絲。麻。竹箭。出花。樺皮。羚羊。麝香。紫草。人參。茯苓。安息

香。五味子。松蕈。石蕈。海松子。鱧魚。松魚。黃魚。鰻。蛤。紅蛤。



瓜魚。古刀魚。海參。銀魚。銀口魚。青魚。廣魚。紫蟹。秀魚。石花。

餘項魚。洪魚。魴魚。蟹。麻魚。貂。青鼠。山獺。海獺。水獺。藿。鹽。

【城郭】 邑城。

石築。周四千六百三十三尺。高六尺。內有十六井三池。

【烽燧】 無乙界帖烽燧。

在府東一百七里。東應洪原縣南山。西應狄仇未。

狄仇未烽燧。

在府東八十里。東應無乙界。南應馬仇未。

馬仇未烽燧。

在府東六十三里。北應狄仇未。西應昏東帖。

昏東帖烽燧。

在府東三十八里。東應馬仇未。西應安陽外串。

安陽外

串烽燧。

在府南二十四里。東應昏東帖。北應城串山。

城串山烽燧。

南應安陽外串。西應定平府鼻白山。

【宮室】 慶興殿。

在府東歸州洞。我太祖舊邸之址也。恭靖王及太宗。誕降于是。為建此殿。

【樓亭】 聞韶樓。

在客館北。○李石亨記。自鐵嶺以北。延袤千餘里。表以巨海。重以大山。雄藩名鎮。鱗錯碁布。而成獨當其衝。其中山川清淑之氣。磅礴扶輿。實我

國家億萬年無窮之業。先王潛邸陵寢。俱在焉。人物之繁夥也。城邑之宏壯也。海錯桑麻之富贍也。亦宜最一方而擅東北之美也。然此道壤隣野人。俗參狂獪。凡控制之方。綏撫之策。摠于



監司。自非有宿德重望。疇克當之。是以國家於注擬監司。視他道尤重。必慎簡大臣。而兼尹于茲。歲丁卯。醴泉權公孟孫。以刑曹判書。特膺是命。既視事。政修弊祛。人用大和。府之客館北。舊有樓。歲久頽圯。公詢諸群吏曰。爾府爲興。王舊地。一道之望。而凡應接賓旅。館宇湫隘。儀觀未稱。盍撤舊而新之。吏咸喜躍。不閱月而工訖。樓凡三間。翼以簷牙。軒楹敞豁。面勢得宜。一州之勝。於是焉具。戊辰秋。予謁告而歸。權公命予曰。上以咸爲。祖宗肇基之地。特賜龍飛新樂。府之榮極矣。而樂之來。會值樓成之日。亦不爲斯樓之幸歟。樓旣成樂又至。而子又適至。可不志其顛末以示後人乎。子歸爲我求額而文之。僕還。請書聞韶樓三大字以歸之。寵也。予惟韶舜樂也。孔子嘗謂之盡美矣。又盡善也。在齊而聞。不知肉味者三月。爲其情文之備且盛也。今龍飛之作。推本。祖宗積累之德。以成一代禮樂之美。雖舜韶揖讓繼紹之實。亦不得專美也。是宜形於詩詠。播之管絃。用之於鄉國也。况豐沛之地。人民父老。及見。先王肇造之蹟。咸被。先王仁厚之澤。其聞詩詠之詞。而懽欣感慕者。爲何如也。嗚呼樓之作。不於昔而於今。新樂之降。不先後於樓而於此時。豈非天賁斯樓。托嘉名而傳於不朽也哉。乃登斯樓。乃張斯樂。宮角相宣。金石迭和。咽九奏於鈞天。播五絃之南風。斯樓之勝。蓋於是乎益勝矣。○權孟孫詩。六龍飛御海東天。萬物涵濡雨露邊。積累仁功超百代。巍峩德業應千年。贊揚樂府頌豐沛。歌詠新詞被管絃。繼述聖明敦化育。大平風雅永流傳。○朴元亨詩。高樓登眺正春天。往事悠然一望邊。豐上諸陵凡幾世。岐陽舊宅已多年。樂聞韶奏齊三月。歌入薰風舜五絃。珥筆何須探古跡。大書留與後人傳。○李思哲詩。芒碭雲氣漢家天。日出咸池照四邊。燕翼神功基此地。龍飛遺跡想初年。慶鍾玄鳥延洪祉。詠播綿瓜聽雅絃。盡善已忘三月味。大風宜向沛鄉



傳。○尹子雲詩。金碧觚稜勢入天。八窗風景浩無邊。漢家豐沛經千古。周國岐幽歷萬年。醉裏清談王衍塵。閑中佳趣伯牙絃。登臨此日龍興地。詞頌欣聞樂府傳。

南華門

樓。府城。仙景樓。在客館北。○洪逸童詩。方今聖化遠漸東。萬里朝天一路通。虎踞雄關當海上。翬飛傑閣聳雲中。深秋南浦青嵐捲。孤鶴西山夕照紅。此

日登臨思盛業。欣聞仙樂響雲空。○朴元亨詩。高閣層臨大野東。遙岑來控海門通。幽風稼穡千年後。魏國山河一望中。碧草堤邊江雨白。綠楊陰下露桃紅。孤吟未就登樓賦。長笛聲催弄晚

空。○李思哲詩。六龍時御起天東。豐沛如今雨露通。萬里江山吟嘯裏。一樓風景畫圖中。遙瞻華嶽雲連白。緬想咸池日浴紅。已播長風嘯有土。更無纖靄翳青空。○尹子雲詩。畫樓形勝甲天

東。舉目江山面面通。靄靄落霞斜日外。迢迢遠樹淡煙中。荷擎玉沼玻璃碧。酒溢金罍琥珀紅。倚醉登臨忘客路。晚來嵐翠入簷空。樂民亭。在城川江上。七寶亭。

在東軒。鶴仙亭。在加乙罕川邊。康孝文爲觀察使時建。觀風亭。在聞韶樓東。

【學校】 鄉校。在府北一里。

【驛院】 平原館。在府南二里。德山驛。在府東北三十二里。新院。在府東北五十二里。平川院。在府西十九里。傍有鶴仙亭。

【新增】 倉庫 屏風坡社會。在府北二百六十五里。高遷社會。在府北九十五里。漢厚仇非社會。在府



北二百  
退朝社倉。在府東六十里。  
昏東社倉。在府東三十五里。

【佛宇】新興寺、正菴寺。俱在雲住山。  
望海寺。在牛頭山。  
中天寺、頓水寺。俱在千佛山。  
隱

跡寺、水菴寺、安心寺。俱在麒麟山。  
淨水菴。在五峯山。

【祠廟】社稷壇。在府西。  
文廟。在鄉校。  
城隍祠。在城內。  
松島祠、花島祠。並春秋本邑致祭。

厲壇。在府北。

【陵墓】定陵、和陵。  
我桓祖淵武聖桓大王及懿惠王后陵同塋。在歸州洞。○參奉二人。鄭摠碑。上即位之二年春正月辛未。命臣摠若曰。予以否德。荷

天休命。肇造家邦。維祖宗積德是賴。謹已追諡四代。皆上王爵。汝其銘我先烈祖考定陵碑。昭示永世。臣摠承命祇慄。不敢以鄙拙辭。嘗觀孟氏之言曰。五百年必有王者興。前朝自始祖王氏以來。垂五百年。運祚既衰。恭愍絕嗣。妖僧辛旽子禍。冒姓竊位。荒淫戾虐。歲戊辰。與其相崔瑩。謀興師妄動。將犯天子之境。生民之禍。靡所紀極。維時我主上殿下。為右軍都統使。仗義還師。禍乃知罪。遜位子昌。越明年。天子責以異姓為王氏後。殿下以侍中任國政。與諸將相議立王氏之裔瑤為君。初自禍時。政在權臣。鬻賣官獄。濁亂朝政。攘奪土



田。籠絡山野。紀綱大壞。毒痛日甚。民乃怨咨。日夕思治。及殿下作相。革除舊弊。更新治道。罷私田以正經界。汰冗官以重名器。登崇俊良。放竄頑兇。奮武威以却邊寇。施仁政以厚民業。整頓紀度。修明禮樂。三韓之民。父母愛之。瑤乃昏迷。闇於大體。崇信奸回。廢黜忠直。聽婦寺而亂田制之正。任私昵而紊名器之公。政令無常。以壞國法。用度無節。以傷民財。信群小浸潤之譖。忌殿下匡復之功。迺與其相鄭夢周。常謀陷之。夢周陰嗾其黨之在臺諫者。欲加功臣及直言者罪。羅織上書。將及殿下。禍在不測。國人莫不憤怨。洪武二十五年七月十六日。左侍中臣裴克廉、右侍中臣趙浚等五十二人。知天命之所在。察人心之所歸。倡以大義。百官父老。不謀而同。合辭勸進。殿下讓至再三。衆志彌固。勉卽寶位。市不易肆。兵不血刃。會朝清明。民乃大悅。卽遣中樞臣趙胖奏聞。帝迺詔曰。三韓之民。旣尊李氏。民無兵禍。人各樂天之樂。乃帝命也。未幾中樞臣趙琳繼還。又勅國更何號。星馳來報。卽令藝文館學士韓尙質。奏請國名。賜以朝鮮之號。且曰體天牧民。永昌後嗣。其獲天人上下之助如此。誠所謂五百年而興者也。臣謹按。濔源所自。全之望族。有司空諱翰。仕新羅。娶太宗王十世孫軍尹金殷義之女。生侍中自延。侍中生僕射天祥。僕射生阿干光禧。阿干生司徒立全。司徒生兢休。兢休生廉順。廉順生承朔。承朔生充慶。充慶生景英。景英生忠敏。忠敏生華。華生珍有。珍有生宮進。宮進生大將軍勇夫。大將軍生內侍執奏璘。執奏娶侍中文克謙之女。生將軍陽茂。將軍娶上將軍李公諱康濟之女。生知宜州諱安社。後仕元朝。爲南京五千戶所達魯花赤。卽我殿下皇高祖。今封穆王。陵號曰德。配李氏。千牛長史諱公肅之女。今封孝妃。陵號曰安。皇曾祖諱行里。襲封千戶。今封翼王。陵號曰智。配登州崔氏。今封貞妃。陵號曰淑。皇



祖追贈贊成事諱椿。今封度王。陵號曰義。配文州朴氏。封敬妃。陵號曰純。皇考贈門下侍中榮祿大夫判將作監事朔方道萬戶諱子春。屢立邊功。以長萬夫。至正庚子四月甲戌。病薨于朔方道。年四十六。其年八月丙申。葬于咸州之東歸州之原。今封桓王。陵號曰定。配崔氏。贈判門下永興伯靖孝公諱閑奇之女。封懿妃。陵曰和。世積勳德。肇基王迹。善鍾慶發。源遠流光。篤生聖哲。以建大業。天之眷佑有德至矣。王凡三娶。懿妣又生一女。適三司左使趙仁璧。李氏生男曰元桂。仕前朝封完山君卒。金氏定安翁主生男曰和。封義安伯。殿下配韓氏。贈門下府事諱卿之女。先薨。贈節妃。陵曰齊。生男曰芳雨鎮安君。曰芳果永安君。曰芳毅益安君。曰芳幹懷安君。曰太宗諱靖安君。曰芳衍早沒。贈元尹。二女皆幼。繼室康氏。判三司事諱允成之女。封顯妃。生男曰芳蕃撫安君。芳碩幼。女適京山李氏濟。封興安君。鎮安娶贊成事池瀾之女。生男曰福根。元尹。永安娶贈門下左侍中金天瑞之女。益安娶贈門下贊成事崔仁斗之女。生男曰石根。元尹。懷安娶贈門下贊成事閔璿之女。生男曰孟衆。元尹。靖安娶藝文館大學士閔霽之女。撫安娶歸義君王某之女。臣竊觀帝王之興。其祖宗積累之遠。本枝蕃衍之多。未有若周家者也。爰自后稷。歷數十世。以至文武而興王業。振振麟趾。誥誥螽斯。實基八百年之歷。亦有仁厚之德。以致之者也。今我國家。自司空至于桓王。積善攸久。而我殿下以英明之資神武之略。遠紹遺烈。光膺大慶。以開億萬世無疆之休。金枝之衍。既蕃且茂。誠與周家並隆。是其積之者久。故發之者大。樹之者固。故傳之者遠。於戲盛哉。臣摠拜手稽首。獻銘曰。於皇仙李。本固根深。粵自司空。世茂德音。長發其祥。至于桓王。誕我明主。奄有東方。歷數有歸。不試戎衣。與民更始。昭布德輝。王曰不穀。獲膺天祿。寔繇祖宗毓慶之力。廼



稽舊章。追諡以王。潛德斯著。不顯其光。振振公姓。卽篤其慶。維本維支。萬世有永。瞻彼歸州。有時其丘。王氣鬱葱。無疆維休。臣拜稽首。我銘不諛。刻此貞珉。以示後人。義

陵。我度祖恭毅聖度大王陵。純陵。我度祖敬順王后陵。在府東三十三里。○參奉二人。德陵。安陵。我

祖仁文聖穆大王及恭孝王后陵同塋。在府西北六十里。舊韓卿墓。在府北在慶興府城南。太宗十年。同時遷于此。○參奉二人。十里。

【古跡】哈蘭府。元置哈蘭府。其古治在今府南五里。○今按大明一統志。開元城在三萬衛西門外。元志。開元城西南曰寧遠縣。又西南曰南京。又南曰哈蘭府。又南曰

雙城。直抵高麗王都。所謂哈蘭。卽此雙城。卽永興府三萬衛。卽古挹婁勿吉之地。雲田社。在府東十四里。有太祖潛邸時舊宮。其東二里許。地連海汀。綠莎平衍十餘

里。太祖少時。擊毬于此。俗號松原。凡朴仇未。在府西北一百六十五里。昔有人逃賦入此地居焉。以去邑遠。邑人未之知。後從而徙者漸多。邑人乃知。俾供租賦。今別

置社倉。松豆等。在府南十里。卽我太祖所遊地。今置內需分司。德山古城。石築。周四百九十七尺。今廢。白雲山古城。

在府西六十三里。石築。周一萬四千五百七十三尺。今廢。德山洞草原古城。在府東北四十八里。土築。周退潮古

城。在府東六十里。石築。周四千九百十七尺。今廢。中峯古城。在府西二十七里。石築。周閑堂古城。在府西



土築。周六千五百一十一尺。今廢。

吾老村古城。

在府北三十五里。石築。周一千七十六尺。今廢。

宣德鎮。

在府南四十五里。有城基。

【名宦】【高麗】李澤。

睿宗三年。為咸州大都督府使。

【本朝】鄭甲孫。

兼府尹。

金好智。李宗謙。

咸禹治。

兼府尹。

申漑。

成化丁亥。以觀察使兼府尹。李施愛之黨。謀殺漑。舉兵圍府衙。漑知不免。持弓矢登樓。射殺四人。矢盡引折其弓。罵賊而死。

【寓居】【本朝】金光晬。

登第官至大司憲。

【烈女】【本朝】莫莊。

以節義旌門。

【題詠】昔日九城曾紀績。

鄭夢周詩。揚鞭出塞正秋天。吟想興亡賦一篇。云云。先朝萬里又開邊。

山寨行逢雨。

前人詩。落葉正續

紛。思君不見君。元戎深入塞。驕將遠分軍。云云。城樓起望雲。干戈盈四海。何日是修文。

畫角聲高欲暮秋。

鄭道傳詩。遠隨戎旆過東州。云云。往事奢華無處

問。冷煙衰草鑽荒丘。

咸州原是國中央。

前人詩。湖光天影共蒼茫。一片孤雲帶夕陽。忍向此時聞舊曲。云云。

萬葉璿源基此地。

崔孝孫詩。咸平風氣似南州。二月東風草半抽。云云。居民曾見翠華遊。

雲山點點玉簪抽。

朴堧詩。萬里東溟一岸州。云云。春風花鳥妖氛絕。想像當年鳳輦遊。

### 永興大都護府

東、至海岸五十里。南、至高原郡界十四里。西、至平安道孟山縣界二百二十五里。至同道寧遠郡界二百十里。北、至定平府界二十四里。



距京都七百

五十二里。

【建置沿革】本高勾麗長嶺鎮。或稱唐文。

唐一作堂。

或稱博平郡。高麗初爲和州。

光宗六年。始築城堡。成宗十四年。改和州安邊都護府。顯宗九年。降爲和州防禦使。爲本營。高宗時趙暉卓青。以州叛附于元。元乃置雙城總管府。因合于登州。猶稱防禦使。後併于通州。忠烈王時復舊。恭愍王五年。遣兵收復。爲和州牧。十八年。陞爲和寧府。置府尹少尹判官。明年置土官。本朝

太祖二年。以永興鎮外祖崔氏之鄉。改今名爲府。

太宗三年。以府人從趙思義構亂。降爲郡。明年復舊。十六年。降爲和州牧。

置牧使判官。罷土官。

世宗八年。改爲永興大都護府。

世祖朝置鎮。

成宗元年。移觀察使本營于此。陞爲府。



殿下四年。復移觀察使本營于咸興府。降為大都護府。

【郡名】博平。雙城。和州。唐文。長嶺。和寧。歷陽。

【姓氏】【本府】崔、張、金、石、李、朴、吉、宋、韓、閔、劉、鄭、盧、

邦、扈、固、安、拓、禹、孫、沈、魏。高、龍。並來。周。續。【永興】

崔、劉。並續。【靜邊】尹、金、高、延、朴、文、李、盧、趙、韓、魏、

元、任、柳、沈。白、吳、石。並來。【長平】孫。續。

【山川】聖歷山。在府西二里。鎮山。劔山。在府西北九十里。其上國泰山。在府西十五里。上

有屏風山。在府西六十里。其上平廣可居。其中太博山。在府西三十五里。艾田峴。

應。有池。若人家住著。則有恒雨之災。烏嶺。在府西三十里。上有光城嶺。在府東三十

在府西一百八十里。平安道孟山縣界。古名孟州峴。石塔。俗稱胡宗塔。里。極高險。長平嶺。



十里。平安道熙川郡界。要害處。

籠岩洞。

在府東十五里。

山倉洞。

在府西七十里。

海。

在府東五十里。

沸流水。

在靜邊社。

距府西五十里。其源水穴。圓徑五尺三寸。幽深不測。湧出為川。流入龍興江。

龍興江。

在府東北二里。古名橫江。其源有四。一沸流水。一出馬踰嶺。一出艾田峴。一出

陽德縣境居次嶺。至庫岩。與松魚灘合。名橫川。過龍神堂至鎮靜寺西絕壁下。名鶻鷗淵。下有廣灘。中有白石。形如白馬。以石隱現。知水深淺。經邑城東北為此江。南流入海。○河崙奉使

至此。都巡問使姜淮伯。置酒中流。請曰。府乃度祖桓祖卜宅之地。

熊島。

在府東南九十五里。

而太祖誕生于是。此江尚無名稱。不亦一欠乎。崙乃以龍興名焉。

周十五里。

豬島。

在府東七十里海中。

大豬島。

在府東六十里。

茅島。

在府東一百六十里。

末應島。

一云黑島。在府東九十

里。連陸

潭泉。

在府東十五里。微温而鹹。浴之多已病。

有牧場。

【土產】

絲。麻。竹箭。

我世祖時。自江原道。舟載竹根。種子猪島。

鐵。

出山倉洞。

鉛。

出府東秃旨社。

五味子。

紫草。安息香。人參。松蕈。茯苓。蜂蜜。餘項魚。秀魚。麻魚。鱧魚。

蟹。銀魚。松魚。紅蛤。廣魚。黃魚。洪魚。瓜魚。青魚。鰻。魴魚。石

花。蛤。銀口魚。古刀魚。海參。藿。鹽。



【城郭】 聖歷山城。

石築。周二千九百八十二尺。高五尺。中有一井一池。有軍倉。

山倉洞城。

石築。周五千五十八尺。高四尺。有軍倉。

【烽燧】 鎮戍山烽燧。

西應高原郡熊望山。北應古寧仁城。

古寧仁城烽燧。

在府東四十里。北應定平府元定峴。南應鎮戍山。

【新增】 末應島烽燧。

北應定平道安峴。南應文川黃石帖。今上五年。革鎮戍山古寧仁城兩烽燧。移合于此。

【宮室】 璿源殿。

在府東南十三里黑石里。即我桓祖舊邸。太祖誕生之地。正統癸亥。鄭麟趾奉安。太祖辟容。幘背有書曰。青龍白虎左右邊。山虎石上如蹲踞。公

侯富貴榮華世。出世統領大將軍。雷振名譽天下遍。四海無防車書通。三尺劍頭安社稷。一條鞭未定乾坤。凡五十六字。○參奉二人。【新增】李淑瑛詩。駕晏荆山寶座非。辟容瞻拜重依依。分

明一幅丹青濕。恍惚重瞳日月暉。鳥雀亦知朝玉殿。風雲長為護金扉。祠官手炷爐烟細。更拂餘香携滿衣。

【樓亭】 望京樓。

在客館東。○申叔舟詩。雙丸走板促年華。世上浮生正有涯。無限旅懷江郡雨。唯餘春事海棠花。登臨面面山雲合。坐見村村麥穗斜。望遠有時愁共遠。

沉吟徙倚  
意如何。

【學校】 鄉校。

在府南一里。○權近記。立廟以祀先聖。立學以教子弟。遍天下。歷萬歲而不廢。蓋人之有天性。固不可不學。而學之為道。尤不可不講聖人之書也。國家令



府州郡縣。莫不置廟學。遣守令以奉其祀。置教授以掌其教。蓋欲宣風化講禮義。作成人才。以裨文明之治也。歲戊寅春。樞相孫公。以東北面都巡問使。兼尹永興府。既下車。適值上丁。躬行釋奠。觀其廟學隘陋頹腐。泫然出涕。欲更營之。且其地勢卑湫。不足改爲。退而咨於父老曰。生民以來。未有盛於孔子。天下古今。靡不祠之。爾府廟學。湫隘若此。寧不愧歟。况治人之道。莫先於學。此界隣狄。舊尙武而不崇文。頑獷之俗。今猶未革。爾府最鉅。爲諸郡所視效。盍新營構。興儒講道。以爲之倡乎。衆口僉同。議以克合。乃相少尹舊廬之基。厥土爽塏。厥勢環拱。乃治其位。乃興其工。星焉往來。躬自勸督。少尹李公云實。亦樂助之。邑人前判事李用和。實幹其役。聖廟鬻舍。咸中厥位。樓其南而門其下。不數月而告成。聚諸生金廉等六十餘人。教育惟勤。前成均樂正金公稠。適以教授官至。孫公喜之。勸講益力。漸磨經術。學有日進。越明年己卯之科。生員趙斜、金濂、李陽敷等。皆自是學。哀然而起。擢中科第。蓋自是府置學以來。所未嘗有。實賴孫公勸課之功。金公教誨之力也。永樂紀元之夏。金公復爲司藝。陽敷亦爲博士。偕仕成均。予以不才。忝知館事。二子具言孫公盡心興學之事。請記顛末。以示永久。予惟三代之學。皆所以明人倫。六籍之書。亦所以明斯道。居是學而讀是書者。當思有以求道。其亦思有以厚其倫。爲臣盡忠。爲子盡孝。以至長幼朋友。隨所往而各盡其職。此乃儒者之實學也。徒泥章句。不治身心。華其文辭。以徼利達而已者。非吾孫公興學之意也。孫公開國元勳篤信好善君子也。予固重之。今聞二子之言。益知公之爲政。急於先務。以是施之。優於一國矣。故併及之。

【驛院】

和原驛。

在府東四里。

龍興院。

在龍興江北岸。

【新增】

金彼院。

在府北二十里。定平府界。



【佛宇】安佛寺。

在光城嶺東。

圓明寺。

在劔山。

鎮靜寺。

在大博山。

普賢寺。

在國泰山。

【祠廟】社稷壇。

在府西。

文廟。

在鄉校。

城隍祠。

在聖歷山。

厲壇。

在府北。

沸流水祠。

祀典。載小祀。春

秋降香祝以祭。

末應島祠。

春秋本邑致祭。

【塚墓】崔閑奇墓。

在府南十五里。

【古跡】平州鎮。

在府西北七十里。本永興鎮。高麗文宗十五年。始築城堡。本朝太祖二年。改本府號為永興。而因改鎮名為平州。城基猶存。○金克己詩。塞城依

翠麓。秋晚氣偏清。露砌黃花泣。風軒赤葉鳴。一溪心可瑩。千嶂目增明。但恨光陰速。容華易變更。

靜邊鎮。

在府東六十里。有石城舊基。高麗顯宗二十二年。始置鎮。

靖宗五年築城。○金克己詩。一簇亭臺四望賒。雕甍彩檻爛馳華。歌姬勸酒樽頻倒。醉客題詩字半斜。玉槩侵簷攢紫篠。金釧傍砌落黃花。隔牆遠見丹楓樹。何處林園似謝家。

寧仁

鎮。在府東六十里。一云清源。

本朝太祖六年築城。

長平鎮。

在府東四十五里。本長平鎮。古稱古叱達。高麗光宗二十年。始築城。恭愍王六年。改為縣置令。

耀德鎮。

在府西一百二十里。本顯德鎮。高麗顯宗十四年築城。恭愍王改為縣。○已上。今廢為社。○社猶言里也。本道人凡稱里皆為社。

北樓。

金克己詩。樹



石叢中紫翠樓。紅埃不起綠陰稠。水流雙派鬻分尾。山聳數峰鼇舉頭。  
竹露洒成晴晝雨。松風吹作暑天秋。劉琨月下誰長嘯。虜騎驚魂遁北陬。  
喜雨樓。金九容詩。慘淡秋光

涵塞日。空濛海氣雜林霏。望中千里農桑富。疇昔強梁幾悔非。  
古鐵甕城。在府西二百十里。土築。本在平安道孟山縣界。移屬于府今廢。

【名宦】【高麗】智蔡文。

顯宗朝。契丹兵至。遣蔡文將兵鎮和州。以備東北。

金甫當。

毅宗朝。為東北面兵馬使。有膽氣。鄭仲夫等放王子

巨濟縣。明年甫當欲討仲夫等。復立毅宗。與錄事李敬直、張純錫、柳寅俊、兵馬使裴允材、知兵馬使韓彥固。謀起兵奉毅宗出居鷄林。為安北都護府所執。義方鞫殺之。  
李公

老。明宗朝登第。調判官。出私財貸民賦。以最徵為司儀署丞。

【本朝】李宜洽。

世宗朝為府使。以政最特拜右副承旨。李誠長。為府

使。李英耆。為判官。李繼孫。

以觀察使兼府尹。始北人未知學。繼孫聚子弟之年少者。教經史。立勸課之法以獎之。自是人興於學。六鎮亦有登第者。

【人物】【高麗】崔閑奇。

生懿惠王后。配桓祖。誕我太祖康獻大王。元授千戶。本朝贈判門下府使永興伯。諡靖孝。

【本朝】金

原桂。

太祖朝。為泥城萬戶。時倭賊寇宣州。原桂率兵赴援。力戰解圍。遂乘勝逐之。突入虜中。為賊所害。

【寓居】【高麗】田永需。

官至知州事。早休官退居。遁村李集。往尋不遇。題詩云。同年田知州。不見數十年。枉道不辭遠。悠悠催著鞭。天寒日云暮。茅屋依山前。適值採藥去。不得共被眠。淵明早歸去。應有招隱篇。



可隣蘇季子。那無負郭田。  
卜隣素有約。歲晚相攀緣。

【題詠】和州客舍雨連明。

鄭夢周詩。云云。門外猶聞刀斗聲。  
帳裏將軍呈燭坐。曉來贏得鬢絲成。

鬱葱佳氣擁神州。

金壽

寧詩。帝遣清川沸地流。云云。重  
華當日耕漁跡。都在龍興聖歷頭。

### 定平都護府

東、至海岸三十里。南、至永興府界四十五里。西、至平安道寧遠  
郡界一百二十五里。北、至咸興府界二十里。距京都八百二十一里。

【建置沿革】古稱巴只。

一云  
宣威。

高麗成宗二年。置千丁萬戶府。靖宗七年。始

築城堡。置關門爲定州防禦使。高宗時沒于元。恭愍王五年。遣兵收復。陞  
都護府。本朝因之。

太宗十三年。以與平安道定州同名。改今名。【官員】府使、教授。

各一人。

【郡名】巴只。宣威。千丁。中山。定州。

【姓氏】【本府】安、林、申、金、崔、韓、李、全、陳、杜。

並續。

【長谷】孟、



金、燕。並續。【元興】李。陽城。鄭。長鬢。金。谷州。【宣德】韓、金。並登州。安。長鬢。

【山川】鼻白山。在府北四里。鎮山。到城山。在府西十里。劔山。在長谷縣。距府西一百里。道安山。在府南五十里。

堂山。在府南四十五里。元定峴。在府南三十二里。城山。在預原縣。距府南三十三里。加莫洞。在府西一百十里許。平安道寧遠

郡境。海。在府東三十里。柱川。在府南五十里。今稱金伊江津。即長溪川下流。長溪川。在府南三十三里。源出加莫洞。甘祥

津。柱川南流三十里許。為此津。入道安浦。

【土產】絲。麻。紫草。人參。茯苓。五味子。蜂蜜。麝香。安息香。銀魚。

麻魚。銀口魚。蟹。松魚。鱧魚。古刀魚。黃魚。青魚。鰻。蛤。藿。白

魚。瓜魚。紅蛤。青鼠。貂。鹽。酥油。秀油。錢魚。魴魚。【新增】海松子。

【城郭】邑城。石築。周五千九百二十八尺。高八尺。內有十井三池。地北依古長城。

【關防】道安浦營。在府南五十二里。隸南道。○水軍萬戶一人。【新增】今上四年革。



【烽燧】鼻白山烽燧。

北應咸興府城串山。南應元定峴。

元定峴烽燧。

南應永興府古寧仁城。北應鼻白山。

【新增】道安

峴烽燧。

在府南五十里。北應鼻白山。南應永興末應島。正德庚午。革元定峴烽燧。移合于此。

【學校】鄉校。

在府西一里。

【驛院】蓬臺驛。

在府北五里。

酒泉驛。

在預原縣。距府五十里。

草原驛。

在府南三十五里。

濕峴院。

在府西三十一里。

【新增】南山院。

在府南五里。

柱川院。

在府南四十三里。

【佛宇】觀音寺。

在到城山。

正林寺。

在道安山。

歡喜寺。

在白雲山。

孝順寺。

在中峰山。

毗沙

門寺。

在城山。

【祠廟】社稷壇。

在府西。

文廟。

在鄉校。

鼻白山祠。

祀典。為北嶽。載中祀。每春秋降香祝祀之。

城隍祠。

在鼻

白厲壇。

在府北。



【古跡】 長谷廢縣。

在府南五十五里。本高麗長州。一云椴林。一云端谷。顯宗三年築城。九年稱長州防禦使。後降為縣來屬。本朝 世宗四年。革為長谷社。

預原廢縣。

在府南四十五里。高麗靖宗十年。城柱川為元興鎮。有鎮使。睿宗十一年。城預州置防禦使。後來屬。本朝 太祖七年。合預州元興為預原郡。世祖四年。

省郡來屬。今稱禿山社。有軍倉。別號原城。

古長城。

高麗時所築。西踰大嶺。東接都連浦。三周其隍。以禦女真。此乃三關門之地。詳義州。

古長州

城。

在府西南五十五里。石築。周二千二百三尺。今廢。

古元興鎮。

在府南五十里。土城。周四千四百十七尺。今廢。

隨時里古城。

在府

南四十里。土築。周一千一百九十一尺。今廢。東距預原郡五里。

細柳古城。

在府南三十里。土築。周四千二百二十八尺。今廢。

蓬臺古城。

在府北六

里。石築。周二千二百六十尺。今廢。今稱古邑城。

金伊江城。

在府南五十里。石築。周七百十八尺。今廢。

汝委古城。

在府西四十里。石築。周二百

八十二尺。今廢。長谷驛。舊址在長谷縣。

【新增】

道安浦廢鎮。

【孝子】 【本朝】 鄭得信。

朱伊里人。父得惡疾。斷手指和藥以進。疾即愈。成宗四年。事 聞。旌閭。

【題詠】 浦澗南連宣德鎮。

鄭夢周詩。定州重九登高處。依舊黃花照眼明。云云。峰巒北倚女真城。百年戰國興亡事。萬里征夫慷慨情。酒罷元戎扶上馬。淺



山斜日  
照紅旌。

白榆多處馬頻嘶。

鄭樞詩。定州關外草萋萋。沙磧無人日向西。過海腥風吹戰骨。云云。

披荆營峻宇。

崔迥詩。太守超

黃霸。中山是穎川。云云。留犢象先賢。

地盡樹浮川。

高得宗詩。天低雲出岫。云云。

### 高原郡

東、至永興府界十五里。北、至同府界二十里。南、至文川郡界十五里。西、至平安道陽德縣界一百十里。距京都七百十六里。

【建置沿革】古德寧鎮。

一云洪源郡。

高麗光宗二十四年始築城。成宗十四年。為高

州防禦使。顯宗十九年。城鳳化山南。以徙州治。恭愍王五年。改知州事。

### 本朝

太宗十三年。改今名。為郡。【官員】郡守、訓導。

各一人。

【郡名】德寧。洪源。高州。

【姓氏】【本郡】金、李、曹。

韓。登州。

【隘守】韓。

續。

【山川】楸山。

在郡北十里。鎮山。

熊望山。

在郡北十三里。

九龍山。

在郡西七十里。

屈城山。

在郡北十五里。



伐羅山。在郡西十里。鶴山。在郡西四十里。串餘嶺。在郡西一百十里。平安道陽德縣界。竹田嶺。在郡西九十里。德之

灘。在郡北七里。其源有二。一出串餘嶺。一出永興府竹田嶺。與照章灘合。過郡治南爲此灘。東南入于海。魚梁之利。爲一道最。神堂淵。在郡北十里。箭

灘。在郡南十五里。鉢山堤。在郡東五里。又見文川郡。

【土產】絲。麻。人參。五味子。紫草。礪石。出郡西院歧伊。燈石。出伐羅山白石窟。麝香。

鱧魚。松魚。瓜魚。黃魚。

【烽燧】熊望山烽燧。東應永興府鎮戍山。南應文川郡天佛山。

【學校】鄉校。在郡東二里。【新增】今移在郡西一里。

【驛院】通達驛。在郡西五里。○金克己詩。烟楊窳地拂金絲。幾被情人贈別離。林外一蟬諳客恨。曳聲來上夕陽枝。巨防驛。在隘守鎮。今廢。

要光院。在郡西四十里。箭灘院。在箭灘岸。



【佛宇】栖雲寺。

在熊望山。鶴山寺。在道成山。

【祠廟】社稷壇。

在郡北二里。文廟。在鄉校。城隍祠。在郡西三里。厲壇。在郡北二里。

【古跡】隘守鎮。

在郡西七十里。石築。周一千五百六十八尺。古稱梨柄。高麗成宗二年所築。本隸文州。恭愍王九年來屬。今廢。

古郡。

在今治北十五里。

成宗二十二年。以郡距永興甚邇。且被火災。人多疫癘。移治于鉢山社。

【名宦】【本朝】李績。

【題詠】南郊多臥犢。

朴元亨詩。蒼生五袴歌。紅腐九年粟。聖化自東漸。云云。

# 新增東國輿地勝覽卷之四十八



新增東國輿地勝覽卷之四十九

安邊都護府

東、至江原道歙谷縣界九十五里。南、至同道伊川縣界八十八里。至同道淮陽府界八十五里。西、至任內永豐縣界九十里。至江原道平康縣界一百

五里。北、至德源府界二十

五里。距京都五百八十四里。

【建置沿革】

本高勾麗比列忽郡。一名淺城。新羅眞興王十七年。爲比列州置軍主。

景德王改朔庭郡。至高麗改爲登州。成宗十四年置團練使。顯宗九年改登

州安邊都護府。高宗時。定平以南諸城。被蒙兵侵擾。移寓江陵道襄州。

再移杆城。幾四十年。忠烈王二十四年。各還本城。本朝

太宗三年。以府人趙思義作亂。降爲監務。明年復爲都護府。

世祖朝置鎮。

成宗二年。陞爲大都護府。

殿下四年。降爲都護府。【屬縣】鶴浦縣。

在府東六十里。本高勾麗鶴浦縣。新羅改今名。爲金壤郡領縣。高麗顯宗九年來屬。本



朝因永豐縣。在府西九十里。本甌大伊。高麗穆宗四年。築城置鎮。後改爲縣來屬。本朝因之。

【鎮管】都護府一。德源。郡一。

文川。【官員】府使、教授。各一人。

【郡名】比列忽。淺城。朔庭。登州。朔方。鶴城。

【姓氏】【本府】韓、全、盧、桑、孫、崔、金、張、尹、邢。任、許、宋。

並來。【鶴浦】楊、李、孟、印。孟、楊、南、孫、金、李、宋、田。並壓戎戌。

【福靈】崔、尹、宋、李。【文山】許、朴、盧。【翼谷】李、申。一作辛。韓、

敬、安、芳。一作方。【霜陰】金、吳、陽。崔。東州。宋。歧城。金。

豐壤。劉、林。並霜林。○崔以下並禾登戌。【瑞谷】吉、田、玄、元、金、張、孫、劉。

【衛山】方、羅、韓、任、蔡、吳。【永豐】赫、林、吳、萬、禹、康、

韓、劉。並來。【派川】洪、金、全、李、楊。一作陽。



【形勝】前對鵠山。下臨鯤壑。

金克己詩。前對鵠山平似案。下臨鯤壑杳如盃。

【山川】鶴城山。

在府東五里。鎮山。形似鶴故名。

劍峯山。

在府西南三十五里。本名雪峰山。山上三石峰屹立。故俗稱劍峰。

烏鴨山。

一云黃龍山。在府東六十里。極高絕。南連鐵嶺。山頂有池。天旱禱雨輒應。洞裏又有九淵。

白雲山。

在府東十里。

風流山。

在翼谷縣。距府南九十里。

其上有池。世傳。空中時有音樂聲。故名。

鐵嶺。

在府南八十三里。高麗置關門。號鐵關。○鄭道傳詩。鐵嶺山高似劍鋒。海天東望正茫茫。秋風特地吹雙鬢。驅馬今朝到朔

方。○卞仲良詩。鐵關城下路歧賒。滿目烟波日又斜。南去北來春欲盡。馬頭開遍海棠花。【新增】

南袞送節度使李長坤賦。登州之南。連城之北。巨嶺巒岒而造天。勢遮截乎方域。根長白而蔓延。

南走數千里而磅礴。當其未有夫路也。但見萬仞之蒼壁。愚公逡巡而却走。巨靈撫掌而辟易。人

烟阻絕而不通。風氣隔關乎區落。不知在何年代兮。尋鳥道而開鑿。一線初縈於林表。羊腸漸盤

於犖确。人馬既通。關爲夷程。麗氏設關。以鐵爲名。吁嗟百二之重險兮。閱幾代之紛爭。吾想

夫尹瓘之北征。遇睿王之英明。畜累世之宿憤。思一舉而掃清。威風受鉞。長春頓兵。十萬齊驅。

千里麾征。睥睨孔明之嶢陵。踏藉韓信之井陘。元戎未離於關阨。威稜已振於虜庭。追奔出於巴

只。拓地至於九城。奏凱而返嶺路坦平。何其蹙歎。下逮衰世。賊有暉青。叛付胡元。盜據和寧。

衣冠界關而爲限。半邊草木受汚於膾腥。重以乃顏餘燼。稔豨突而獶獶。踰開元而掠和登。殺人

爲糧。靡有孩嬰。王將望風而奔潰。凶醜鼓行而入關。彼守琪羅俗亦何人哉。見白日以何顏。雖



欲偷生而負國。豈有國破而身完。棄天險而不守。糜百萬於凶殘。亦見紀綱之渙散。國步因以屯艱。至今叢條疊穎之帶憤。尙欲爲當時而誅姦。真人起沛。志在濟安。倏關以西。白氣漫漫。除殘去暴。以靖東韓。于疆于理。包括河山。昔日外寇。今在房闔。誰借東封之一丸。撤關毀防。無復譏察。但見行旅之閑閑。嗚呼丘陵無變而成敗殊塗。險固自若而興衰異蹟者。豈非時之利鈍。由人謀善惡。人之用捨。係國勢強弱。故曰固國不以山谿。地利不如人和。舟中敵國。何有魏侯之山河。禁中頗牧。足以宣威於唐家。惟用賢爲長城。通古今而一科。撫前朝之得失。何足置於齒牙。我送君歸。登峻阪之陂陀。歸雲鬱其纓帶。凍雨催以滂沱。發長劍以舒嘯。斷離思之紛拏。安得與君。駕尻輪而馳神馬。絕大漠而凌蒼霞。陟白山之絕頂兮。望尹碣以摩挲。臨瀚海而酌蒼波。洗胸中之嵯峨。奏徵招而歸來。以獻夫胡越一家之歌。

法乎峴

在府東二十里。

老里峴

在府西五十五里。峴上築長城。有煙臺。古關防處。由此達于黃

海。在府東三十里。

溫泉

在府西南一百五十七里。

南大川

在府西南五里。源出江原道平康縣分水嶺。北流過益谷縣。又東

北流至富坪爲深川。西至五里爲官渡。緩流停匯。東岸斗起如龜形。俗謂龍堂。其前白沙平衍有景致。東北流入海。

國島

在府東六十里。○李穀記。島去岸十里許。入自西南

隅。水際白沙如練。其下平地五六畝。形若半壁。中有屋基。人言浮圖者所居也。其上山圍若玦。勢不甚高。蔓草覆之。又無樹木。視之一土坡也。舟而小西。崖岸稍異。其崖石則皆方直櫛比而壁立。其岸石則皆平圓排列。一面可坐一人。然不整齊也。行數百步。其崖高可數百尺。其石白色。方直長短若一。每一條其頂各戴一小石。若華表柱頭者。仰面而視。可竦可愕。有一小窟。



撐舟而入。漸窄不能容舟。視其窟深不可測。其左右束立之石。如外面更整齊。其上石脚下垂者。皆平正如覆棋局。若一一鉅而斷之者。以此觀之。則非惟外面如此。盡一島乃一束方石條也。其窟巖岩。使人魂悸不可久留。回舟而北。又有一面如圍屏者。捨舟而下。徘徊攀緣。大槩石與窟無異。而崖不甚高。其下稍平易。其圓石排列者可坐千人。遊觀者必憩息於此。有人留飲。慮其風作。且非煙火食者所住。傍崖而東南。又行數百步。崖石稍異。作方鐵網盛水磨小圓石。長五六十尺。一條若一條。一面皆是。人謂鐵網石。此其國島之大槩者也。○安軸詩。蒼海支流作鏡湖。青峯四擁水平鋪。中藏別島非塵土。上有高臺作畫圖。日映波心跳尺鯉。雨晴沙背戲雙鳧。百年前輩風流散。唯有長松老不枯。○仙島遙疑駕六鰲。茫茫去路隔雲濤。浮宮一朵孤峯兀。插海千條恠石高。望斷身嗟無鳥翼。涉來命恐等鴻毛。滿磯苔上散輕葉。打岸風前掀小舫。搖棹疲民流熱汗。具筵貧邑瀝殘膏。若爲添作東溟水。沒盡奇觀免此勞。

女島。在國

島北。距府  
壓戎串。在府東五  
三十里。十五里。

【土產】絲。麻。紫草。松茸。竹筍。出壓  
戎串。五味子。人參。安息香。茯苓。茅

香。羚羊。麝香。梨。出釋王寺。世  
稱釋王梨。蜂蜜。洪魚。黃魚。蟹。松魚。鱧魚。

麻魚。鮓。銀魚。紅蛤。秀魚。瓜魚。青魚。銀口魚。餘項魚。廣魚。魴



魚。古里麻。海參。酥油。石花。古刀魚。鹽。蛤。

【城郭】鶴城山城。

在府東五里。石築。周三千九百三十尺。高十二尺。內有四泉。有軍倉。○新羅孝昭王時。築比列忽城。疑此。

【關防】浪城浦營。

在府北二十五里。隸南道。○水軍萬戶一人。[新增]今上四年革。

【烽燧】沙峴烽燧。

南應鐵嶺。北應鶴城。

鶴城烽燧。

北應德源府見山。南應沙峴。

鐵嶺烽燧。

北應沙峴。南應江原道淮陽

府所山。

[新增]

浪城峴烽燧。

在府北三十一里。東應壓戎串。西應德源長山。

壓戎串烽燧。

在府東六十三里。東應馬巖。西應浪城峴。

馬巖烽燧。

在府東九十一里。西應壓戎串。東應江原道歙谷縣致空山。

[新增]

【宮室】

客館東軒。

李冑詩。鐵關天險似秦中。古塞悲笳落遠空。凍雨斜連千嶂雪。飢鴉驚叫一林風。百年去住身先老。半世悲歡氣挫雄。萬里羈懷

愁不語。關河迢遞近山戎。

【樓亭】北樓。

金克己詩。誰開玉帳枕河魁。漢將旌幢去復迴。北虜畏威皆落膽。行看爭叩紫關來。

駕鶴樓。

在客館南。○李子松詩。身倦呀咻獨上樓。沉吟



俯檻久遲留。月圓月缺山依舊。花落花開水自流。滿目煙霞成活畫。洒簾風雨產清秋。傍人應笑重來客。乘駟奔馳老未休。○鄭夢周詩。試問何人始起樓。登臨聊復爲淹留。十年道路負心事。百戰山河堪淚流。太守政聲清似水。書生行色冷於秋。侍中過此題詩句。仰看沉吟未肯休。○鄭道傳詩。上相登臨駕鶴樓。眼前詩句壁間留。江山信美非吾土。歲月無情逐水流。遙望星辰高北極。遠遊鞍馬記前秋。一身萬里倦行役。徙倚闌干得暫休。○朴元亨詩。仗節巡臨古郡樓。感懷觴詠暫時留。雲從沛澤途中起。江入歧山洞裏流。遼鶴去餘城似舊。舜田耕處麥成秋。此身已許黃河誓。誰向林泉學退休。

### 元帥臺。

在鶴浦縣。海邊有大澤。澤中有小峯。昔知兵馬使遊憩此峯爲名。○李穀詩。百頃湖心孤嶼青。詩人增損作新亭。重來載酒須千斛。不待風吹

骨已醒。○鄭樞詩。輕橈徐轉上層臺。日射滄溟天倒開。回首押戎殊不遠。蘭舟又載月明廻。

### 新增 龍堂亭。

在府西三里。○李胄辭。江之水兮悠悠。客有大夫

而士兮。橫截流以方舟。高歌鐵笛響徹乎澄湫兮。鼉鼉舞而魚龍愁。王母罷宴乎瑤池。遣群仙而邀三洲。江妃水伯出沒而逢迎兮。豐隆亦爲之馳驅。追少杜兮秦淮。和蘇仙兮赤壁。魂遊於瀟湘而洞庭兮。又何雲夢之兩澤也。余旣非隴西之人兮。恨無仙風而道骨也。思孔氏之歎逝兮。知觀水之有術。亦自擬於呂翁兮。欲朗吟而飛過。尙戀夫妙娘之歌發棹兮。倚青蛇而長嗟。向鐵關而南望兮。悟此身之作客。白雲鬱而迢遞。終南忽兮無寸碧。惟忠孝之非二門兮。豈無私恩與公義也。泊舟登岸而徘徊。天渺渺兮江易駛。

### 【學校】 鄉校。

在府東五里。○金克己詩。憶昔詞臣踐將營。儒宮百堵一時成。圖形準擬乾坤大。詠德揄揚日月明。松社仁風吹翠樾。杏壇化雨浥江英。至今一境多豪俊。



文花鏘鏘  
擅鳳鳴。

【驛院】高山驛。

在府南七十五里。察訪。本道屬驛十三。南山、朔安、火燈、奉龍、鐵關、良驥、通達、隘守、和原、酒泉、蓬臺、平原、德山。○察訪一人。

朔

安驛。

在府北三里。

南山驛。

在府南二十五里。

奉龍驛。

在府西三十里。

火燈驛。

在府東五十里。

南山院。

在府

南二十五里。

龍池院。

在府南五十里。

拯生院。

在府東五十里。

【佛宇】釋王寺。

太祖潛邸時建。

養老寺。

俱在雪峯山。

迦智寺。

戒淨菴。

廣德寺。

普賢寺。

俱在鳥

白雲寺、石寶寺。

俱在白雪山。

【祠廟】社稷壇。

在府西。

文廟。

在鄉校。

城隍祠。

在鶴城山。俗稱宣威大王之神。○金克己詩。妙物冥冥未有原。誰知顯貺被人寰。珠宮枕

浪藏鵬海。玉宇凌雲寄鶴山。聖子洋洋森左右。神王赫赫儼中間。鄉風簫鼓日迎送。國典節旄時往還。水旱不惟歸掌握。恩威無奈在容顏。魔軍屏氣皆驚遁。萬里煙埃靜柳關。

厲

壇。

在府北。

霜陰神祠。

在霜陰縣。諺稱。宣威之夫人。其俗每以端午。迎宣威并祭之。



【陵墓】智陵。

翼祖聖翼大王陵。在瑞谷縣奉龍驛北。距府治三十八里。○參奉二人。

趙墩墓。

在府南二十五里。

【古跡】文山廢縣。

在府南三十里。本高勾麗加支達縣。新羅改菁山。為朔庭郡領縣。高麗初改汶山縣。顯宗九年仍屬。後改今名。本朝因之。

翼谷廢

縣。

在府南六十五里。本高勾麗於支吞縣。新羅改翊溪。為朔庭郡領縣。高麗改今名仍屬。本朝因之。

瑞谷廢縣。

在府西三十五里。本高勾麗康谷縣。一云首乙吞。

新羅改今名。為朔庭郡領縣。

派川廢縣。

在府東九十五里。本高勾麗歧淵縣。新羅改今名。高麗顯宗九年來屬。本朝因之。

衛山

顯宗九年仍屬。本朝因之。

廢縣。

在府南五十二里。高麗勾時稱號未詳。高麗顯宗九年來屬。本朝因之。

福令廢縣。

令一作靈。在府西三十里。或稱福寧鄉。或稱福平鄉。

霜陰

廢縣。

在府東三十里。本高勾麗薩寒縣。新羅改今名。為朔庭郡領縣。高麗顯宗九年仍屬。本朝因之。

鶴浦橋。

在鶴浦縣。恭讓王時。我太祖至此橋適睡。馬蹉跌

而墜。太祖下立。以兩手執馬耳及鬃。馬懸空而絡不捨。令人拔所御刀。斷去鞍具而後捨之。馬沉復浮而出。

鞍帖。

在瑞谷縣南。諺傳。昔有一夫。北赴長城役。覺妻有身。役罷

還家。道遇一男子負米而行。問其鄉里。乃其子也。遂相携痛哭。嚙指出血。畫父子形於岩石。遂俱死仍葬之。

壓戎戍。

卽壁戎串。

鐵垣戍。

在府東派

川社海口。有小石城。世稱

香登戍。

在府東四十里。

新增

浪城浦廢鎮。

戍城。在江原道歙谷縣境。



【名宦】【新羅】成宗。

真興王十七年。以沙湊成宗為軍主。

武仙。

文武王二十一年。仙率精兵三千。戍比列忽。

【高麗】鄭思

道。

恭愍王時為府使。鎮方面有節度。

【本朝】

金孝誠。

金召南。

【新增】南季堂。

慈祥愷弟。有循吏風。

【人物】【高麗】韓卿。

贈門下府事安川府院君。寔生神懿王后。配我太祖。誕恭靖大王。恭定大王。

金升彥。

中元朝制科。有才行。

李靱。

登第。官至政堂。

【本朝】

金成庭。

登第。位至嘉善大夫。

【孝子】

【本朝】

姜廉。

以孝行旌門。官至判事。

【新增】

仇叱非、仇叱德。

兄弟也。父為虎所攪。併力捕虎。父得免。今上十一年旌閭。

【題詠】龍爭古壘黃榆月。

安軸詩。萬疊山圍四望中。東溟隔岸水浮空。云云。鷓噪遺墟老樹風。懷土重遷憐噍類。棄城謀變說姦雄。當時誰握籌邊策。惆

悵無人衣一戎。

暮天懷古立城頭。

前人詩。云云。赤葉黃花滿眼秋。不覺蕭牆藏近禍。唯憑海島作深謀。百年丘壠無情草。十里風煙有信鷗。遙望朔方空嘆息。

一聲羌笛使人愁。

凝烟畫嶂千山暮。

朴信詩。云云。滿帽清風六月秋。

滄溟波靜千秋月。

朴元亨詩。此地曾經劔戟中。如今萬

事摠成空。云云。關塞雲收一笛風。明府已應歌杜母。騷人誰是繼楊雄。坐來更賀東漸化。時見梯航有野戎。

地接金源山似戟。

鄭樞詩。登和往事角聲中。遠上



峰頭瞰碧空。云云。天低桑域海無風。慎郎旗倒千年恨。  
尹相碑成一代雄。寄語東偏衣皮類。吾王神武厭興戎。

半空鼓角風吹落。

金克己詩。云。幽壑煙霞

日照  
開。

### 德源都護府

東、至海岸七里。南、至安邊府界二十五里。西、至同府任內永  
豐縣界三十里。北、至文川郡界十六里。距京都六百三十五里。

【建置沿革】本高勾麗泉井郡。

一云於  
乙買。

新羅改井泉郡。高麗時稱湧州。成宗十

四年。置防禦使。後改宜州。睿宗三年築城。本朝

太宗十三年。例改宜川。

世宗十九年。改今名。為郡。二十七年。以

穆翼度桓四代御鄉。陞為都護府。【官員】府使、教授。

各一  
人。

【郡名】泉井。於乙買。井泉。湧州。宜州。宜川。德州。東牟。宜春。宜

城。春城。

【姓氏】【本府】康、崔、朴、吳、韓、俞、李、高、趙、燕、鄭、安、裴。



崔、徐、白。並來。金。續。【鎮溟】鄭。迎日。黃。平海。張、金。並蔚州。長鬚。盈德。

朴。蔚州。禮州。姜。續。【龍津】宋。清州。趙。楊州。金、玄。並鹽州。

【山川】盤龍山。在府西十五里。又見文川郡。所依達山。在府北二十里。松山。在府東北二十五里。馬樹嶺。一名

馬息山。在府西三十里。海。在府東七里。又府北十里。府內川。在府南百步許。出盤龍山東流入海。鎮溟浦。在鎮溟縣東四里。竹島。

在府東十五里。有竹。高麗時。定州以南十二城人物。合入此島以避蒙兵。趙暉卓青。與女真布只員通謀。殺都兵馬使慎執平。以迎敵。館舍民居遺址尙存。薪島。在府東三

十七里。連島。在府東三十里。一云李島。連陸有居民。草島。在府三十里。

【土產】絲。麻。紫草。甘草。人參。麝香。安息香。羚羊。茯苓。蜂蜜。

五味子。竹箭。出竹島。松魚。鱧魚。青魚。瓜魚。廣魚。古刀魚。魴魚。江

瑤柱。出龍津縣。採之甚艱。邑民五十餘戶。因之失業。逃散幾盡。高麗庾碩爲東北面兵馬使。一禁絕之。流亡盡還。蛤。海參。麻魚。紅



蛤。蟹。黃魚。銀口魚。石花。銀魚。洪魚。秀魚。古里麻。酥油。鹽。

【烽燧】榆峴烽燧。

在府北三十五里。北應文川郡天佛山。南應拔山。

拔山烽燧。

在府北七里。北應榆峴。南應見山。

見山烽燧。

在府南二十二里。北應

拔山。南應安邊府鶴城。

【新增】

長德山烽燧。

在府東七里。北應文川黃石帖。東應安邊浪城峴。今上五年。革榆峴拔山見山等處烽

燧。移

合于此。

【學校】鄉校。

在府西一里。【新增】今移在府北一里。

【驛院】鐵關驛。

在府北七里。

銘石院。

在府南十三里。

【佛宇】安養寺。

在府西十里。我太祖少時讀書于此。

雲石寺、隱寂寺。

俱在盤龍山。

松林寺。

在松山。

芍

達寺。

在府西二十里。

【祠廟】社稷壇。

在府西。

文廟。

在鄉校。

城隍祠。

在府北二里。

所依達山祠。

春秋本邑致祭。

厲壇。

在府北。



【古跡】古井泉城。

在府北十五里。石築。周四千三百二十二尺。今廢。

鎮溟廢縣。

在府南二十四里。或稱圓山縣。又名水江。高麗顯宗九年。改

今名。為縣令。後來屬。今稱鎮溟社。○縣城石築。

龍津廢縣。

在府東三十里古狐浦。高麗時改今名。為鎮。穆宗

周二千二百八十七尺。高九尺。內有二泉。今半頽圯。

九年築城。後屬文州。洪武十二年。析置縣令。我世祖五年。省縣來屬。稱龍城社。割縣北龜

山社明孝社。以屬文川郡。○郎門山城。石築。周三千四尺。高五尺。三面濱海。內有一井。

鐵關。

在府北十五里。石築。周一千四百三尺。高麗恭愍王時。三善、三介誘致女真。侵掠北邊。都指揮使韓方信、兵馬使金貴等。進兵和州。兵潰退保鐵關。和州以北皆沒焉。官

軍累敗。將士喪氣。日夜望我太祖之至。太祖自西北面引軍至鐵關。人

湧珠里。

在府南十里。

心皆喜。將士膽氣自倍。與方信、貴。三面進攻大破之。悉復和咸等州。

穆祖自全州徙三陟。又徙于府。一百七十家從之。居府之南湧珠里。生翼祖。翼祖徙居慶興

府。避亂入赤島。自赤島還于此。改名赤田社。慶興之民從之者如歸市。又徙咸興松頭等里。生

度祖。未幾還赤田居焉。度

鎮溟浦。

在鎮溟縣東四里。高麗末倭寇鎮溟城。焚燒倉廩。殺掠人民。其後始設兵船。泊于鎮溟浦。倭不復至。浦

祖時門扉。至今藏于府庫。

之水道淤淺。移泊兵

船于安邊之浪城浦。

【名宦】高麗金有成。

為掌書記。

【本朝】李師季。

為府使。勸農桑。

【新增】

宋叔琪。趙



玉崑。金錫弼。

【寓居】【高麗】趙噉。

漢陽人。世居龍津。忠肅王時。吏民遁入女真。王遣噉至海陽等地。刷還百餘戶。累轉禮儀判書龍城君。歸老龍津。子仁沃欲從行。力止

之曰。吾家遭時危疑。先祀之存。僅如毫髮。過蒙玄陵眷顧。一門以全。百無所報。若等無以老父為念。致力王室也。

【本朝】趙仁沃。

噉之子。詳見漢城府人

物。權綸。安東人。登第。歷官至江原道觀察使。久長胄監。師生下。以長者稱。晚年退休于府之素羅里。構逍遙亭以自樂。

【題詠】朔風吹起鐵關情。

金九容詩。萬里滄波一草亭。云云。百年緘虎成屯處。依舊鷄鳴狗吠聲。

老狐棲古壘。

卞仲良詩。迢

遞鐵關北。孤臣奈此何。云云。夕鳥聚寒柯。湖海三年謫。秋風百感多。那堪正飄泊。賴有故人過。

山勢蜿蜒鍾白頭。

尹子雲詩。地靈歟歙掀蒼海。云云。

地入漢圖傳萬世。

朴元亨詩。一區勝境真陘口。百戰孤城是石頭。云云。詩留幽雅幾千秋。

好是德源天作地。

金壽寧詩。蟠桃結子

三千禩。仙李盤根八百秋。云云。綿瓜一閱頌王休。

龍姿實誕千年地。

朴仲孫詩。云云。鳳曆應傳億載秋。

沛原舊物苔扉在。

許琮詩。日出都門到北州。倚欄清興壓羈憂。樓臺影倒天低處。山岳精儲地盡頭。青海日輪方轉曉。赤田花木不知秋。云云。坐對村翁語未休。



### 文川郡

東、至德源府任內龍津縣界十四里。南、至同府界十七里。西、至平安道陽德縣界五十四里。北、至高原郡界三十三里。距京都六百六十八里。

【建置沿革】古稱妹城。高麗成宗八年。築城爲文州防禦使。後合于宜州。

忠穆王元年。復析爲州。本朝

太宗十三年。改今名。爲郡。【官員】郡守、訓導。各一人。

【郡名】妹城。文州。伊均。

【姓氏】【本郡】李。陰竹。蔡。平康。朴。春州。全、朴。並續。

【山川】盤龍山。在郡西南二十五里。鎮山。天佛山。在郡北二十五里。普賢山。在郡北十里。頭里山。在郡西五十里。

海。在郡東三十里。配歧伊川。在郡西五十七里。箭灘。在郡北三十三里。配歧伊川下流。至盤龍山東爲此灘。又至郡東爲文州浦。與高原郡德之灘。

合入永興府龍興江。院歧川。在郡南一里。一名石川。出盤龍山。東流過德源府龍城縣。入海。四訥島。在郡東三十里。有牧場。馬島。

在郡北四十里。種竹。



【土產】絲。麻。鐵。

出頭  
甲山。

紫草。清松子。茯苓。竹箭。

出馬  
島。

蜂蜜。人參。

五味子。麝香。鱧魚。洪魚。魴魚。廣魚。秀魚。松魚。銀口魚。黃魚。

銀魚。古刀魚。蛤。紅蛤。麻魚。石花。青魚。蟹。瓜魚。海參。古里麻。

酥油。鹽。

【烽燧】天佛山烽燧。

北應高原郡熊望山。  
南應德源府榆峴。

【新增】黃石帖烽燧。

西應永興末應島。南應  
德源長德山。今 上五

年。革天佛山烽

燧。移合于此。

【樓亭】節文樓。

在客館北。○金壽寧詩。豪氣徒聞百尺樓。寧知飛閣敞邊州。十千不為陳王  
樂。一笑非關越女留。大地炎蒸風正靜。老天紺碧火如流。當時喝死應無數。

喜此泠然

汗漫遊。

【學校】鄉校。

舊在郡東五里。成宗二十  
一年庚戌。移于郡北一里。

【驛院】良驥驛。

在郡東五里。古高宗驛。我  
稱德宗驛。成宗六年。避  
懷簡大王廟號。改今名。

琵琶院。

在郡南  
十七里。



前有池。形如琵琶故名。

【佛宇】靈德寺。

在盤龍山。

天佛寺、青蓮寺。

俱在佛山。

道昌寺。

在郡南八里。寺中有大樹。洪武戊辰年盡枯。至辛未

壬申年復條達敷榮。此正與漢時僵柳更生同符。時人以爲本朝開國之兆。今廢。

【祠廟】社稷壇。

在郡西。

文廟。

在鄉校。

城隍祠。

在郡北三里。

厲壇。

在郡北。

【陵墓】淑陵。

翼祖貞淑王后陵。在郡東十五里草閑社。○參奉二人。

【古跡】古伊均城。

在郡東五里。有遺基。

雲林鎮古城。

在郡西三十里。石築。周一千二百十三尺。高十二尺。高麗顯宗時築。以爲防禦所。

今仍稱鎮司。

龍津廢縣。

在郡東三十里。今稱明孝社。又見德源府。

德寧驛。

古址在郡北十五里。

末屹石城。

在郡北二十五里。

有古基。漕至浦。

在郡北五十里。永興高原船卒戍之。成宗二十年革罷。

【新增】【孝子】【本朝】卯乙同。

年十八。父得病濱死。割股和藥以進。病愈。今上十三年旌閭。



【題詠】垂柳陰中百鳥鳴。

鄭道傳詩。文州城外草青青。云云。不識清明寒食過。日斜猶自向西行。

山如螺髻四環青。

金潤

宗詩。云云。亭午花間一鳥鳴。莫擬皺眉驢背客。春風四牡丈夫行。

【新增】雪際松巒一點青。

閱壽千詩。云云。荒城鼓角地中鳴。生平意氣羞雌伏。

走遍天南  
又北行。

### 北青都護府

東、至利城縣界六十八里。南、至咸興府界八十里。西、至洪原縣界五十六里。北、至甲山府界一百六十八里。距京都一千八十三里。

【建置沿革】本高勾麗舊地。久為女真所據。高麗睿宗二年。遣尹瓘逐女真。

置九城。時稱號未詳。

後沒于元。稱三撒。恭愍王五年。收復舊境。置安北千戶防禦

所。二十一年。改今名為州。置安撫使兼萬戶。本朝

太祖七年。改青州府。

太宗十七年。以與清州牧同音。復稱北青。

世宗九年。改為都護府。

世祖十二年。置鎮。稱兵馬節度副使。以副使兼之。又置判官。未幾罷副使。



十二年。平李施愛。以南道距北道遠。置南道節度使。以府爲本營。【鎮

管】郡一。端川。縣二。洪源。利城。【官員】府使。一人。南道節度使兼。判官、教授。各一人。

【郡名】三撒。青州。安北。青海。

【姓氏】【本府】李、趙。並續。

【山川】連德山。在府西二里。鎮山。大德山。在府北二十里。立石山。在府東六十里。山上有立石。北麓又有立石。高三十六尺廣

十二尺。如樹碑。聖代山。在府北八十一里。竹坡山。在府西九十九里。咸興府界。中山。在府東三十五里。僧房洞山。

在府西四十五里。大洞山。在府北二十里。厚致峴。在府北一百九里。蔓嶺。在府東六十八里。利城縣界。成

以北。人物不通。官軍討之至此嶺。施愛悉其兵來逆戰。大敗而遁。卒擒斬之。○梁誠之平朔方序。恭惟我 聖上之十三年夏五月。賊臣李施愛。以吉州叛。上震怒。命都摠使臣浚、副使

臣錫文。領京兵三千。往征之。又命鎮北將軍臣純。領平安道兵。征虜將軍臣仲善。領黃海道兵。踰陽德嶺進討。又命臣俊、臣有臨、臣進忠、臣義堅、臣嶠、臣子慶等。領京畿、忠清、

全羅、江原道兵助戰。大兵俱會于咸興府。摠三萬人。進屯北青。六月丁巳。賊乘夜來突。諸將出戰大敗之。以地勢不便。退屯于洪原。七月丁亥。僞署北青守者來上官。方張樂宴飲。我師誦



知之。遣銳師入擊。殺獲幾盡。遂還據北青倉。時賊據利城。依海岸以陳。八月丁酉。大軍進攻之。賊以彭排前蔽。矢下如雨。我軍冒白刃以登。戰酣。大將魚有沼。由海邊越險阻而入。賊不意官兵從其背而下。出死力鏖戰。我師勇氣百倍。自午至酉大戰。賊魁棄旗先遁。遂大敗。大軍乘勝追奔。斬數千級。越磨天磨雲嶺。至吉州嶺東驛。賊魁焚其居。挈妻子與數百騎。逃至明源站。僞將李珠等。縛賊魁來降。斬于陳前。以其首送京師。上大赦境內。梟于市三日。只留偏師鎮北方。從征軍士。賜酒食罷遣。仍給復三年。大小將士論賞有差。臣竊惟咸吉道。本祖宗肇基之地。非他道比也。若假息數月間。則其爲害。不可勝言。今出師數月。三戰而定大賊。是雖出於天地。祖宗垂祐之力。實有賴於。睿謀神算之無所遺也。臣職忝史局。當大書特書。以昭武烈於萬世云云。

乾者介峴。

距蔓嶺八里。或云施愛戰敗于此。

馬本嶺。

在府北一百六十七里。甲山府界。

香嶺。

在府北一百三十里。

金昌歧伊。

在府北一百三十三里。端川郡界。

虛件驢耳嶺。

在府北一百四十八里。

觀音窟。

在府西八十二里。窟中有水。

海。

在府東四十三里。又府南六十里。

好望浦。

在府西五十七里。天旱禱雨有應。

五川。

在府東二里。其源五。一出中山。一出大洞山。一出竹坡山。一出僧房洞。

山。合于府西南十里。又與大川合。其源五。故俗稱五川。經府南四十里俗厚村入海。

大川。

金昌歧伊及厚致峴香嶺竹坡山之水。合流于府西南十里。爲大川。又與五川合。

伐成浦川。

在府北一百三十八里。源出香嶺。東流與山北坡川合。

黃水川。

在府北一百二十三里。源出香嶺。東流與山北坡川合。水色黃故名。

山



北坡川。在府北一百十八里。源出厚致峴。與黃水川合。○於丁灘。

秃山川。在府北一百六十二里。源出香嶺。已上四川。俱入于甲山府虛川江。

梨洞川。在府北四十五里。防垣。在府北七十七里。松島。在府南六十四里。陸島。在府南九十里。

【土產】絲。麻。麝香。羚羊。樺皮。石葷。五味子。人參。蜂蜜。海松子。

紫草。漆。秀魚。洪魚。鐵。出聖代山。鱧魚。麻魚。松魚。青魚。黃魚。魴

魚。古刀魚。廣魚。江瑤柱。藿。鮓。紅蛤。文魚。大口魚。銀魚。蟹。餘項魚。銀口魚。紫蟹。海參。古里麻。酥油。貂。青鼠。水獺。海獺。

鹽。【新增】甘草。

【新增】城郭。邑城。正德丁丑。築石城。周六千尺。高九尺。中有一池二井四泉。

【烽燧】馬本嶺烽燧。北應甲山鷹德嶺。虛件驢耳烽燧。北應馬本嶺。獐項烽燧。南應虛件驢耳。南應獐項。

在府北一百二十五里。北應獐項。望德蜂燧。在府北五十九里。北應虛件驢耳。南應厚致峴。厚致峴烽燧。南應望德。應厚致峴。南應者羅。



耳。者羅耳烽燧。在府北二十五里。北加代烽燧。在府南十八里。北應者羅耳。所應應望德。南應加代。西應山芥洞。

居代烽燧。在府東五十七里。東應利城多布山。西應加代。山芥洞烽燧。在府西三十五里。東應加代。南應洪原黃加羅山。[新增]長

津烽燧。在府東南五十里。東應利城縣多布山。南應曳積。曳積烽燧。在府南五十里。南應陸島。陸島烽燧。在府南六十里。南

應洪原縣穿島。

[新增]【宮室】客館東軒。方有寧詩。報國誠無盡。歸田計不成。星星雙鬢換。耿耿寸心明。官事何時了。羈愁與日生。相逢談未足。南北又分行。

[新增]【樓亭】鎮南樓。即城南門樓。倒鏡堂。在城內南。

【學校】鄉校。在府北二里。[新增]今移在府東三里。

【驛院】居山驛。在府東六十里。察訪。本道屬驛十八。咸原、新恩、平浦、五川、濟人、施利、谷口、基原、麻谷、嶺東、臨溟、雄平、明原、古站、終浦、熊耳、虛川、積

生。○察訪一人。五川驛。在五川傍。濟人驛。在府北九十里。平青院。在府西南四十二里。黃水院。在府北三



十五里。蕨坡院。在府東北七十四里。

大定院。在府東三十六里。

**新增** 橋項院。在府西八里。

【佛宇】 安靜寺、日曜寺。

俱在大德山。

鎮淨寺。

在府北二十里平地。

【祠廟】 社稷壇。

在府西。

文廟。

在鄉校。

城隍祠。

在府西三里。

厲壇。

在府北。

【古跡】 弘道洞山城。

在府北七里。石築。周六千七百八十尺。高六尺。今半頽落。

泥亡只山城。

在府北十九里。石築。周四千九百七十五尺。

高五尺。今半頽落。

多灘台山城。

在府南十五里。石築。周一千六百二十一尺。高六尺。今半頽落。

虛川坪城。

在府東三十四里。土築。周

三千四百九十七尺。今廢。

長津浦。

在府東四十七里。本府船卒防戍。今廢。

**新增** 【名宦】 【本朝】 鄭允譔。為判官。

【人物】 【本朝】 李之蘭。

初名豆蘭帖木兒。事我太祖。為開國功臣門下侍郎贊成事。封青海君。諡襄烈。配享太祖廟庭。

【題詠】 山從韎鞞來。

鄭夢周詩。此域昔淪沒。先王還拓開。民稠雜殊俗。地勝產雄材。路向滄溟轉。云云。短衣看射虎。歲晚不知回。

土風崇猛



士。李稷詩。云云。鄉學盛諸生。  
不見遐方俗。何知教化行。

强梁多部族。

鄭招詩。郊原接海平。禾黍屬西成。墟落  
晨烟媚。牛羊夕照明。云云。撫輯愧書生。

剩有高秋興。

新詩當記行。

### 端川郡

東、至吉城縣界六十六里。南、至利城縣界三十七里。西、至同縣界四十  
五里。至甲山府界一百八十六里。北、至野人地界一百七十里。距京都一

千二百七  
十八里。

【建置沿革】本吳林金村。久爲女眞所據。高麗睿宗二年。尹瓘逐女眞。築

城置福州防禦使。四年撤城。以其地還女眞。後沒于元。稱秃魯兀。恭愍

王收復之。辛禡時改端州安撫使。本朝

太祖七年。改知端州事。

太宗十三年。例改今名。爲郡。【官員】郡守、訓導。各一人。

【郡名】吳林金村。秃魯兀。福州。端州。甌山。



【姓氏】【本郡】沈、金。並三陟。

【山川】道德山。在郡西二十三里。鎮山。在郡西二里。天鳳山。在郡西二里。末訖羅山。在郡東八里。

五峰山。在郡西南三十里。亦見利城縣。廻山。在郡南十里。德應州山。在郡東二十里。磨雲嶺。在郡南三十七里。

古稱豆乙外大嶺。○金壽寧詩。窈窕磨雲最上端。玲峴老馬不勝鞍。舊聞鳥道三千里。今陟羊腸百八盤。宿霧輕嵐衣半濕。懸崖絕壁眼雙寒。憑君莫話東征事。鬢髮西風又欲斑。磨天

嶺。在郡東六十六里。舊號伊板嶺。女真人謂牛為伊板。俗傳。昔有人賣犢於山下。其母牛尋犢踰嶺。牛主跡之而至。因為路。故名伊板嶺。又見吉城縣。紅軍坡。在郡

北一百三十二里。於把洞。在郡北八十七里。梨洞。在郡北六十一里。烏曷巖。在郡南十三里海中。其形如帆。水禽羣集其上。俗稱之曰烏曷岩。

烏曷。水都羅和山。在郡北十五里。豆彥台坪。在郡南十里。有牧場。海。在郡東十里。甫耳川。在郡南

里。源出新洞。波獨川。在郡南二里。其源出甲山府境雙青洞。北過採金洞至郡南五里。南流入海。泥糜耳川。在郡東二十里。亦東流與波獨川合。

出雙青洞。過德應州。山南流二十餘里入海。雙城津。在郡東三十里。吾羅退津。在郡東四十里。斜乙浦津。在郡東二十五里。



路洞反浦。在郡南二  
十一里。 卵島。在郡東二十  
一里海中。

**新增** 黃土嶺。在郡西二百五  
十里。甲山界。

【土產】絲。麻。羚羊。麝香。茯苓。五味子。海松子。人參。紫草。石輩。

蜂蜜。鐵。鉛鐵。俱出吐  
羅山。 四色玉。青黃白烏  
俱出梨洞。 石硫黃。出吾乙足  
北峰底。 大口魚。文魚。

銀魚。鮓。魴魚。麻魚。蛤。紅蛤。紫蟹。蟹。鱧魚。松魚。古刀魚。黃

魚。藿。塔士麻。海參。昆布。海獺。貂。青鼠。水獺。樺皮。鹽。

【城郭】邑城。石築。周三千九百六十八尺。高八尺。  
內有三井。世宗三十一年戊辰。之。

【關防】吾乙足堡。在郡北一百二里。石築。周八百六十尺。高八尺。**新增** 在舊堡北六  
十里。石築。城周一千八百尺。高九尺。今上二十四年。置萬戶。

雙青堡。在郡西一百六里。石築。周一千三百八十二尺。高八尺。右二堡。洪原軍卒防戍。  
**新增** 在舊堡西九十里。石築。城周八百四十三尺。高九尺。燕山壬戌。置權管。

**新增** 甌山堡。在郡西一百九十里。今  
上二十三年。置權管。

【烽燧】末訖羅烽燧。東應吾羅退。西應波  
獨只。北應水差德。 吾羅退烽燧。在郡東四十五里。西應末訖羅。  
南應水差德。東應胡打里。



胡打里烽燧。在郡東六十五里。西應吾羅退。東應吉城伐長浦。

水差德烽燧。在郡北四十二里。南應末訖羅。北應國祠堂及吾羅退。

國祠

堂烽燧。在郡北七十三里。南應水差德。北應吾乙足口子北峰。

吾乙足口子北峯烽燧。在郡北一百八里。南應國祠堂。

波獨

只烽燧。在郡西十里。南應利城磨雲嶺。北應獐項。東應末訖羅。

獐項烽燧。在郡北三十五里。南應波獨只。北應古所里。

古所里烽燧。

在郡北六十五里。南應獐項。北應家舍。

家舍烽燧。在郡北九十二里。南應古所里。北應雙清口子北峰。

雙清口子北峯烽燧。在郡北一

百十七里。南應家舍。

新增 新吾乙足堡栢德烽燧。在堡東十里。東應吉州鷹峰。西應隱龍德。

隱龍德烽燧。在新吾乙

足堡南二十里。西應檢義德。

檢義德烽燧。在新吾乙足堡西三十里。西應新雙青堡北峰。

新青堡北峯烽燧。在堡北四里。南應藿嶺。

藿嶺烽燧。在新雙青堡南十里。南應家舍。

新增 樓亭 蓮亭。在郡城西。

挹灑亭。在郡南二里。

學校 鄉校。在郡東二里。



【驛院】施利驛。古稱失里。在郡城南。基原驛。在郡南三里。麻谷驛。在郡北四十五里。我永濟院。

在郡北 忠信院。在郡南 四十里。

【祠廟】社稷壇。在郡西。文廟。在鄉校。城隍祠。在甌山。厲壇。在郡北。

【佛宇】玉龍寺。在天鳳山。花藏寺、蘆洞寺。俱在五峰山。

【古跡】道德山城。石築。周三千九百二十八尺。今廢。德應州山城。石築。周二千七十一尺。高一尺。內有大池。今半頽圮。因緣

古介山城。在郡西十里。石築。周二千九十八尺。今廢。古營回山城。在郡南七里。石築。周二千九十八尺。今廢。甫耳古介山

城。在郡南十五里。石築。周九百六十八尺。今廢。路洞山城。在郡南二十五里。石築。周七百三十七尺。今廢。磨雲嶺長城。其尾

至 海。古端州。在何多里。距今郡治西十三里。路洞小壘。在郡南四十里。麻谷帖小壘。兩壘並丁亥年征李施愛時。官軍所築。

【新增】吾乙足廢堡。今上二 十四年革。雙青廢堡。燕山壬戌革。



【寓居】【本朝】辛元厚。

李施愛之亂。元厚與車云革等。謀欲捕誅。反為賊所獲。比死罵不絕口。事聞。特贈嘉善大夫。

【題詠】秋雨海東頭。

鄭夢周詩。久客嗟吾道。經年尙未休。春風遼左路。云云。鞍馬一身遠。山河千古秋。金源豪俠窟。今日但荒丘。

水複山

重地轉幽。

鄭欽之詩。云云。欄干徒倚久遲留。焦心已覺成衰疾。放意難堪作勝遊。南望白雲長極目。北踰黃磧更回頭。何當掃盡腥膻醜。露布星馳達九旒。

新增

關河千里外。

李胤詩。白首征鞍上。悠悠不自休。云云。燈火五更頭。旅况偏驚雨。鄉愁更值秋。東行見山水。那似我林丘。

### 利城縣

東。至端川郡界四十五里。北。至同郡界三十四里。南。至北青府界三十七里。西。至同府界四十三里。距京都一千一百八十九里。

【建置沿革】古稱時利。高麗時屬福州。至本朝。改福州為端川。仍屬之。

世宗十八年。割端川郡磨雲嶺迤南。時叱間、施利兩社、及北青府東多甫社

迤北等地。置縣。改今名。【官員】縣監、訓導。

各一人。

【郡名】時利。時叱間。多甫。阿沙。

見龍飛御天歌。

觀城。



【山川】鎮山。

在縣西二十里。

城山。

在縣西八里。

靈鷲山。

在縣南二十五里。

檜山。

在縣西四十里。天旱禱雨輒應。

五

峯山。

在縣北十五里。

雲達山。

在縣北十六里。

蕨坡山。

在縣西三十五里。北青府界。

佐翼嶺。

在縣北三十五里。端川郡界。

蔓嶺。

在縣南三十七里。詳北青府。

磨雲嶺。

在縣東四十四里。端川郡界。古之防胡處。有門基樞石。亦名門峴。

多布山。

在縣南三十四里。

烏曷岩。

在縣東二十里海中。

兄弟岩。

在縣東二十三里。小對峙。故名之。

海。

在縣東五里。

卵島。

在縣東三十里海中。

加

次島。

與卵島對峙。

椒皮島。

在縣南三十里海中。

穿串。

在縣南三十里。有岩形如虹門。

小川。

在縣南三里。

羅下洞。

在縣南四十五里。

【土產】絲。麻。人參。麝香。五味子。紫草。石脂。漆。鐵。

出羅下洞。

大口魚。

蛤。紅蛤。江瑤柱。松魚。古刀魚。洪魚。魴魚。麻魚。銀口魚。文魚。

鮓。鱧魚。蟹。青魚。海獺。水獺。貂。青鼠。藿。鹽。樺皮。塔士麻。

銀魚。海參。蜂蜜。石葦。



【烽燧】 多布山烽燧。北應磨雲嶺。西應北青所應居代。

磨雲嶺烽燧。北應端川郡波獨只。南應多布山。

【新增】【樓亭】 浩浩亭。在客館東。東望大海。前臨平野。

【學校】 鄉校。在縣東一里。

【驛院】 施利驛。在縣南四里。谷口驛。在縣東三十五里。○申叔舟詩。平明騎馬出利城。馳上平原望出口。海水正碧合雲綵。赤氣先騰山火急。倏忽雲開

氣亦散。水遠天長共一色。火龍擎出玻璃盤。神光閃閃射人目。扶桑析木定何處。天海茫茫不可極。纔離海底易為高。眼前萬丈在頃刻。世上光陰正如此。令人不覺長嘆息。歇馬來投谷口驛。獨坐無端懷抱惡。百年三萬聊尔耳。榮華好音竟混若。醉生夢死願何為。丈夫要使名不滅。普恩院。在縣南十五里。院洞院。在縣西三十五里。

【祠廟】 社稷壇。在縣西。文廟。在鄉校。城隍祠。在城山。厲壇。在縣北。

【佛宇】 閑堂寺。在雲達山。松林寺。在五峰山。盤龍寺。在鎮山。卵巖寺。在靈鷲山。

【古跡】 城山古城。石築。周九百九十五尺。今廢。時叱間山城。在縣東二十六里。石築。周九百十二尺。今廢。



【新增】【名宦】【本朝】金克誠。

洪原縣

東、至北青府界五十三里。南、至海岸四里。西、至咸興府界三十七里。北、至同府界六十四里。距京都九百七十五里。

【建置沿革】古稱洪肯。或稱洪獻。高麗末始置縣。本朝

太祖七年。改今名。屬于咸興府。

太宗二年。析置縣令。未幾省之。還屬咸興。

世宗十五年。復置縣監。【官員】縣監、訓導。各一人。

【郡名】洪獻。洪肯。

【姓氏】【本縣】李。

【山川】豆無山。在縣北八十五里。

黃加羅山。在縣東三十五里。

大門嶺。在縣東三十里許。有嶺自西而東走。又南迤至海。循嶺

有西城。城有三門。以通行路。西曰大門。中曰中門。南曰石門。石門在海濱。三門相距皆三里許。辛禍時沈德符。與倭賊戰于嶺北大敗。車踰嶺。在縣西五十里。咸興府界。

咸關嶺。在縣西三十七里。咸興府界。

妙峯山。在縣東三十五里。海。在縣南四里。

新翼川。在縣西四里。源出豆無山。經縣西南



九里。至門。要原水。在縣東三十五里。源出北青府中山。南流入海。穿串島。在縣南五里。有穴相通。其上可以射侯。馬郎耳島。

在縣東五十八里。有牧場。門岩。在縣南十里海岸。有石壁立如門。

【土產】絲。麻。石葦。海松子。人參。五味子。紫草。鼎石。出車踰嶺下。鱧魚。

魴魚。松魚。古刀魚。銀魚。筆魚。青魚。江瑤柱。廣魚。洪魚。鮓。紅蛤。海參。黃魚。文魚。麻魚。大口魚。蟹。銀口魚。紫蟹。藿。古里麻。海獺。鹽。

【烽燧】黃加羅山烽燧。東應北青府山芥洞。南應南山。南山烽燧。在縣南二里。西應咸興府無乙界。東應黃加羅山。

【學校】鄉校。在縣東一里。

【驛院】新恩驛。在縣西四里。咸原驛。在縣西三十里。平浦驛。在縣東四十五里。咸關嶺院。在咸關嶺下。

【佛宇】隱寂寺。中菴寺。俱在豆無山。兜率菴。在妙峯山。



【祠廟】社稷壇。

在縣西。

文廟。

在鄉校。

城隍祠。

在縣西二里。

厲壇。

在縣北。

【古跡】韃靼洞。

在縣南三十里。○元丞相納哈出。聽趙小生之誘。入寇三撒忽面之地。都指揮使鄭暉累戰敗績。恭愍王以我太祖為東北面兵馬使遣之。納哈出與小

生、卓都卿等。屯于此洞。太祖踰咸關嶺而至。納哈出置陣相當。率十餘騎出陣前。太祖亦

率十餘騎出陣前相對。納哈出給曰。我之初來。本追沙劉、關先生、潘誠等來耳。非為侵犯貴境。

今吾累敗。喪卒萬餘。亡裨將數人。勢其窮蹙。乞罷戰。惟命是從。時賊兵勢甚盛。太祖知其

詐。欲令降之。有一將立納哈出之傍。射之。應絃而倒。又射納哈出之馬而斃。改乘又斃之。於

是大戰良久。互有勝負。太祖追逐納哈出。納哈出急曰。李萬戶。兩將何

必相迫。乃回騎。太祖又射其馬斃之。有麾下士下馬。以授納哈出遂得免。照浦山。在縣

二里。太祖嘗獵于是山。有三驪為群而出。太祖先射一

驪而斃。二驪並走。又射之。一發疊貫。而矢著於槎甚深。咸關嶺。太祖與納哈出。大戰良

軍以退。自為殿。嶺路盤紆數層。宦者李波羅實在最下層。有二銀甲將。逐波羅實注槩垂及。

太祖廻馬射二將皆斃之。即連斃二十餘人。更回兵擊之。有一賊逐太祖。舉槩欲刺。太祖忽

倒身若墜。仰射其腋。即還騎。又一賊進當太祖而射之。太祖即於馬上起立。矢出胯下。

太祖乃躍馬射之。中其膝。又於川中。遇一賊將。其人甲冑護項。面甲又別作頤甲。以便開口。

周護甚固。無隙可射。太祖故射其馬。馬作氣奮躍。賊出力引轡。口乃開。太祖

祖射中其口。既斃三人。於是賊大奔。太祖以鐵騎蹂之。賊自相蹈藉。殺獲甚多。要原山



城。在縣東三十五里。石築。周九百八十四尺。高四尺。今半頽圯。

**【新增】**【孝女】**【本朝】**吉氏。

家嘗失火。入烈焰中負姑。未及出俱死。今上二年旌閭。

**【烈女】**【本朝】內隱德。

縣東蒙尙里人也。其夫爲虎所扼。內隱德椎殺其虎。夫乃活。事聞旌閭。

**【題詠】**地僻雲煙古。

金壇詩。云云。原低樹木平。長安知幾至。回首不勝情。

邊埃狼煙息。

尹子雲詩。走馬入孤城。遙岑夕照明。田

疇饒黍稌。海嶠半陰晴。云云。滄波蜃氣平。凭軒增客況。村樹遠含情。

**【新增】**烟覆孤村暗。

許琮詩。云云。鷗飛數點明。柳饒春色早。天爲客愁晴。身世年

將晚。關山路不平。困來思就睡。啼鳥起詩情。

### 甲山都護府

東、至建州衛東良北界一百五里。南、至端川郡界九十里、至北青府界一百三十二里。西、至三水郡界六十五里。北、至惠山鎮一百十五里。距京

都一千三百

八十三里。

**【建置沿革】**本虛川府。久爲女眞所據。屢經兵火。無人居。高麗恭讓王三



年。始置甲州萬戶府。本朝

太宗十三年。改今名為郡。

世宗十九年。置鎮稱兼節制使。

世祖七年。陞都護府仍為鎮。【官員】府使、教授。各一人。

【郡名】虛川。夷山。甲州。

【姓氏】【本府】金、石、辛、崔、李、朴、全。並來。崔、尹、李、金、張、

姜。並投化。

【山川】天鳳山。在府東八里。鎮山。長平山。在府東十五里。吾音會嶺。在府西五十里。馬本嶺。在府南一

百三十二里。詳北青府界。熊耳嶺。在府南六十四里。鷹德嶺。在府南一百六里。阿叱間嶺。在府北五十五里。吾老村嶺。

在府南九十里。端川郡界。惠山嶺。在府北九十里。綠礬峴。在府北九十一里。榆波峴。在府南五十六里。香洞。在府西一



百十 鎮東洞。在府東三十七里。 虛川江。在府西一里。北青府伐成浦川、山北坡川、禿山川、黃水川。合流于府南青州歧。歷虛川驛傍爲此江。

惠山江。在府北九十五里。源出白頭山南。西流經惠山鎮。與虛川江合入三水郡。爲鴨綠江。 雲寵川。在府北七十四里。源出胡地。西流與虛川江合。流入惠山

江。 加个川。在府北二里。出鎮東洞。入虛川江。 熊耳川。在府南八十里。源出香洞。經府南青州歧。與亏音水合。西入虛川江。 亏羅漢

嶺。在惠山東北七十餘里。 甫多會山。在府北一百九十里。 豆里山。在府北二百里。 吾時川。奉天臺。白

德山。有大石。四面如削。高三十餘丈。 車軍萬洞。此以下係鴨綠江外之地。 蘆洞。藥水洞。池港浦水。

泡石洞。乾天水。辛多信水。白塔洞。有塔。 白頭山。距府北三百三十里。詳會寧府。 回山寨。

馬竹嶺。葛山。黑山。

【土產】麻。瞿麥。樺皮。白礬。出池。 水泡石、綠礬、礪石。俱出。 五味子。

石輩。海松子。羚羊。貂。青鼠。麝香。水獺。餘項魚。蜂蜜。



【城郭】 邑城。

石築。周二千二百八十一尺。高九尺。

【新增】 外城。

自邑城西。連築至虛川江。五百三十五尺。高九尺。

【關防】 惠山鎮。

在府北九十五里。石築。周二千三百二十尺。高九尺。內有一井。有兵馬僉節制使營。○僉節制使一人。

雲寵堡。

在府北八十里。石

築。周一千四百六十七尺。高九尺。

因遮外堡。

在府北一百三十八里。石築。周二千八百九十尺。高九尺。○已上兵馬萬戶各一人。

同仁堡。

在府北三

十六里。石築。周一千三百五十一尺。

鎮東堡。

在府東十二里。石築。周一千四百九十五尺。高八尺。【新增】今上七年。置權管。

高八尺。【新增】今上七年。置權管。

【烽燧】 因遮外西峰烽燧。

在府北一百四十三里。東應榛遲達。西應三水家南峰。

榛遲達烽燧。

在府北一百二十六里。東應虛川江口。

西應因遮

虛川江口烽燧。

東應惠山東峰。西應榛遲達。

惠山東峰烽燧。

在府北一百里。南應刀山。西應虛川江口。

刀山烽燧。

在府北七十八里。南應時麟浦。北應惠山東峯。

時麟浦烽燧。

在府北七十里。南應綠礬峴。北應刀山。

綠礬峴烽燧。

南應廣生遷

廣生遷烽燧。

在府北九十里。南應厚知。北應綠礬峴。

厚知烽燧。

在府北三十五里。南應南山。北應廣生遷。

北應時麟浦

南山烽燧。

在府南四里。北應厚知。南應榆坡峴。

榆坡峴烽燧。

北應南山。南應鷹德嶺。

鷹德嶺烽燧。

北應榆坡峴。南應



北青馬  
本嶺。  
【新增】南峰烽燧。在府南十五里。南應榆坡峴。北應西峰。今上七年。革南山烽燧移于此。

西峯烽燧。在府西十三里。

南應南峰。  
北應馬山。  
馬山烽燧。在府西二十五里。南應西峯。北應厚知。

【新增】樓亭  
受降門樓。在客館北。  
定遠樓。在客館西。  
一樂亭。在客館北。府使曹閔孫構。  
永保臺。

在府西虛  
川江邊。  
服戎臺。在惠山鎮。

【學校】鄉校。在府北一里。○我太祖即位。自孔州迤北至于甲山府。始建學校。【新增】今移在府南二里。

【驛院】虛川驛。在府南四里。  
終浦驛。在府南一百三十六里。  
熊耳驛。在熊耳嶺下。  
呼麟浦院。在府南五十里。

【佛宇】資福寺。在天鳳山。

【祠廟】社稷壇。在府西。【新增】今移在府東。  
文廟。在鄉校。  
城隍祠。在府南八里。  
厲壇。在府北。【新增】今移在府東。

【古跡】長坪山古城。在府東十三里。石築。周二千六百尺。高九尺。今半頽圯。  
加吾个堡。在府東十三里。石築。周二千六百尺。高九尺。今半頽圯。  
壁城。周一千二百九十二尺。世祖七年革罷。



移設于  
鎮東。寧坡堡。  
世宗二十六年革罷。世祖七年。移設于雲寵。古基在胡地。

榛遲達堡。

壁城。世祖初年革罷。合屬于惠山鎮。古基在胡地。

安定堡。

世祖四年革罷。

柔遠堡。

世祖六年革罷。古基在胡地。

虛川江口行城。

石築。長二千八百尺。高九尺。

【孝子】【本朝】金專。

以孝行旌門。

【題詠】日月韜明疊嶂間。

河演詩。云云。鳴雷注電幾灘灣。片天尺地孤城在。白酒黃花一解顏。

綠水青山幾萬重。

鄭欽

之詩。云云。雲煙掩靄有無中。居民但自知耕鑿。淳朴依然太古風。

### 三水郡

東、至甲山府界一百二十五里。南、至咸興府界三百四十四里。西、至平安道古茂昌郡界一百十里。北至鴨綠江一里。距京都一千五百七十三里。

【建置沿革】本甲山郡三水堡。本朝

世宗二十三年。置萬戶以扼賊路。二十八年。置三水郡。魯山二年。罷郡復

置萬戶。

世祖七年。還為郡。八年陞都護府。十年復降為郡。

自甲山府西北。距二日程。經由棧道。如李方洞、積生洞、



申元節洞、五敢德、虛空橋、黔隱遲達等處。無一步平地。有三大水。一出白頭山下馬竹洞。經惠山鎮暨仁遮外。與崔天已洞水合流入郡界。一出吉城縣北長白山西北堡。經雲寵堡。與虛川江合。至江歧入郡界。一咸興府黃草嶺、赴戰嶺、平安道江界府五萬嶺等水。合為魚面江入郡界。三水合流入鴨綠江。故曰三水。或曰。郡在魚面江鴨綠江三水洞水三歧之間。故名三水。

【官員】郡守、訓導。各一人。

【郡名】三江。

【姓氏】同甲山府。

【山川】長嶺。在郡東五十七里。所羅洞嶺。在郡東一百二十五里。五峯山。在郡南八里。李方嶺。在郡東五十九里。

蛇洞嶺。在郡南六十一里。新路嶺。在郡南一百六十七里。城坡嶺。在郡南二百七十三里。魚面江。在郡西二里。因遮

外川。在郡東七十里。源出積生洞。北流入惠山江。鴨綠江。在郡北一里。即惠山江下流。入崔天已洞。此

下係鴨綠江外之地。上那闌。下那闌。三水洞。古未洞。



【土產】麻。五味子。石葷。海松子。人參。樺皮。瞿麥。蜂蜜。麝香。羚

羊。水泡石。土豹。水獺。貂。青鼠。餘項魚。

【城郭】邑城。

石築。周一千八百十二尺。高八尺。內有三井。

鴨綠江行城。

在郡北一里。石築。周一千五百十七尺。高五尺。

【關防】羅暖堡。

在郡東四十二里。石築。周一千五百三十三尺。

魚面堡。

在魚面江邊。新築石城。○已上兵馬萬戶各一人。

加乙波知

堡。

在郡西十里。【新增】弘治庚申。始築石城。周六百十尺。高八尺。置權管一人。

小農堡。

在郡東二十二里。今廢。【新增】弘治庚申。始築石城。周六百四尺。高八尺。

置權管

神方仇非農堡。

在郡南。【新增】弘治壬戌。始築石城。周一千二百五十尺。高八尺。內有井一。今上十五年。置兵馬萬戶一人。

別害

堡。

在郡南四百三十里。【新增】弘治辛酉。始築石城。周一千三百五十五尺。高八尺。內有二井。今上十五年。置兵馬萬戶一人。

【新增】仁遮外堡。

在郡

東八十五里。石築城。周一千八百五尺。高八尺。內有

甘坡農堡。

在郡南一百十四里。正德戊寅。始築石城。周三百

二井。舊隸甲山。燕山八年來屬。置兵馬萬戶一人。

二十八尺。

高七尺。



【烽燧】加乙波地西峯烽燧。

在郡西二十一里。東應松峰。

松峰烽燧。

在郡西五里。東應南峰。西應加乙波地西峰。

南

峰烽燧。

在郡南一里。東應禿湯。西應松峰。南應金龍已德。

禿湯烽燧。

在郡東十一里。東應羅暖西峯。西應南峯。

羅暖西峰烽

燧。

在郡東三十四里。東應家南峰。西應禿湯。

家南峰烽燧。

在郡東五十七里。東應甲山府因遮外西峰。西應羅暖西峰。

峯田烽燧。

在郡

南一百二十里。

加應戒烽燧。

在郡南一百五十五里。南應新坡。北應新坡。

新坡烽燧。

在郡南三十三里。南應加應戒。北應金乙

德

山。金乙德山烽燧。

在郡南三十二里。南應新坡。北應金龍已德。

金龍已德烽燧。

在郡南十五里。南應金乙德山。北應南峯。

【新增】因遮外西峰烽燧。

在郡東九十里。東應榛遲達。西應家南峰。

榛遲達烽燧。

在郡東一百里。東應惠山江歧伊。西應因遮外

西峰。○已上二烽燧。

舊屬甲山。今移于此。

【新增】樓亭 鎮戎樓。

在客館西。○權敏手詩。樓維新制度。城自舊經營。水近楹掩影。山深鳥不鳴。獵騎依樹聚。邊日照人明。揭號寧無意。平羌莫用兵。

【學校】 鄉校。

在客館西。【新增】今移在客館東。



【驛院】積生驛。

在郡東一百五里。

草坪院。

在郡南四十里。

【新增】三江驛。

在郡內。

所乙外院。

在郡

南二百九里。

安仇非院。

在郡南二百五十一里。

【橋梁】虛空橋。

在郡東。

【佛宇】淨水菴。

在五峰山。

【祠廟】社稷壇。

在郡西。

文廟。

在鄉校。

城隍祠。

在郡北一里。

厲壇。

在郡北。

【古跡】田元京堡。小農堡。

在郡東二十五里。甃城。今廢。

加乙波知堡。

在郡西十四里。甃城。周七百二十六尺。高七尺。

【題詠】胡山漢日明。

李繼孫詩。榆塞狼煙靜。云云。

雲擁秦關暗。

金潤宗詩。三水要衝地。將軍別建營。草芳胡馬健。風緊角弓鳴。云

云。花當蜀道明。方春巡省處。民俗事農兵。

【新增】

斬盡山戎倚白頭。

李繼孫詩。弧矢當年志遠遊。玉關千里任離愁。願將三尺防身劍。云云。



新增東國輿地勝覽卷之四十九



新增東國輿地勝覽卷之五十

鏡城都護府

東、至海岸六里。南、至明川縣界一百四十二里。西、至同縣界一百四十五里。北、至富寧府界四十八里。距京都一千七百四里。

【建置沿革】本號弓籠耳。

遼東誌。作木郎古。

久為女真所據。高麗睿宗二年。尹瓘逐

女真城之。

稱號未詳。

後沒于元。恭愍王收復。本朝

太祖七年。始稱今名。置萬戶。

恭靖王二年置郡。以兵馬使兼郡事。

太宗四年。兵馬使改都兵馬使。仍判郡事。

世宗十八年。陞郡為都護府。以兵馬都節制使。兼判府使。始置判官。及土

官。因為節制使本營。

世祖十三年。改稱北道節度使。仍兼府使。【鎮管】縣二。

吉城。明川。

【新增】吉城陸州。塚五。



西北斜于洞。斜下北。  
朱乙温。魚游澗。  
【新增】州一。吉州。  
【官員】府使。北道節度使兼。判官、教授。各

人。  
【土官】【都務司】都務、校簿。各一人正六品。他邑同。  
典事。一人。  
【典禮署】掌簿、

典事、給事、攝事。各一人。  
【戎器署】勘簿、管事、攝事。各一人。  
【司倉署】【營

作署】並同戎器署。  
【收支局】掌事、攝事。各一人。  
【典酒局】給事、攝事。各一人。  
【司

獄局】攝事。二人。  
【鎮封衛】勵直、副勵直。各一人。  
勵果、副勵果、勵正、副

勵正。各二人。  
勵猛、副勵猛。各三人。  
勵勇。各四人。  
副勵勇。各五人。

【郡名】 弓籠耳。木郎古。雉城。

【山川】 祖白山。在府西五里。鎮山。雪峰山。在府北三十二里。又見吉城縣。白山。在府西一百十里。山勢甚峻。至五月雪始消。七月

復有雪。山頂樹木矮小。土人亦謂之長白。○李穡送張萬戶詩。長白山窮隆。鐵嶺關峯岬。橫亘幾千里。天險不可越。奚丹雜種鳥獸居。弓矢翮猥事馳突。流觀輿地發浩歎。秋草蕭蕭埋尹碣。集賢



學士上將軍。分闡此方親授鉞。我朝愛人豈好大。可忍一方狂似羯。兵端自古慎機牙。民瘼宜先察毫髮。秋霜春日營中天。塞下無令有冤骨。直須倒捲東溟波。變作綠醅終不竭。沉酣億萬爲一心。世奉我王如日月。不妨自製江漢詩。走馬來獻黃金闕。

諸玉山。在府南四十五里。東濱大海。中峰山。在府南一百八里。雲住山。在府

南六十里。立巖。在府南幹合里。高可二百餘丈。土俗謂石爲幹合。因名其地焉。廣巖。在府南一百一十七里。笠巖。在府南一百五十里。○已上

三巖。鼎峙甚奇怪。五峰山。在府南六十五里。白鹿山。在府南一百四十里。江陵山。在府南一百一十里。南濱大海。虛修羅

峴。在府西。富寧北界。賊路哨探處。海。在府東六里。德山川。在府南二里。東流入海。俗名吾村川。魚游澗川。在府北十七里。

東流。朱乙温川。在府南三十二里。東流入海。○已上三川俱源出白頭山。龍城川。在府北三十五里。其源出會寧府餘伊峴。南流一百二十里入海。

○世傳高麗太祖。嘗巡塞有詩云。龍城秋日淡。古戍白煙橫。萬里無金革。胡兒賀大平。明澗川。在府南一百一十五里。源出白頭山。經明川縣斜个洞堡。東流過廣巖。與雲

加委川合。長者澤。在府南九十里。瀰瀰一洞。長十五里。廣三里。深六百餘尺。東流入海。天旱禱雨有應。雲加委川。在府南一百九里。源出白頭

山東南。經中峯山入海。錐峰温泉。在府西三十四里。雲加委温泉。在府西一百十里。長浦池。在府北二十八里。東流入海。



【新增】虛修羅川。

在府北一百三十五里。源出長白山。至檢天朴加遷。入豆滿江。

無界澤。

在府南一百十里。長九里。廣六里。瀾漫一谷。

龍淵。

在府西五十里。祈雨有驗。

元帥臺。

在府南八里。前臨大海。

【土產】

瞿麥。麻。土豹。狼尾。貂。青鼠。羚羊。海獺。水獺。古刀魚。

人參。蜂蜜。五味子。阿羊鹿。松魚。黃魚。洪魚。麻魚。鱧魚。魴魚。

秀魚。大口魚。銀魚。文魚。鯽魚。蟹。蛤。紅蛤。昆布。塔士麻。沙鐵。

藿。鹽。海參。【新增】松蕈。無黍魚。竹箭。

出多湯浦。

【城郭】邑城。

石築。周五千三百八十一尺。高九尺。內有九井。

南山城。

在府西南五里。石築。周三千二百八十九尺。高九尺。內有二井。有軍倉。

【關防】魚游澗堡。

在府北三十五里。石築。周一千八百九十九尺。高八尺。

朱乙溫堡。

在府南三十二里。石築。周一千六十八尺。高七尺。

森森坡堡。

在府南一百二十五里。石築。周一千四百二十三尺。高五尺。○已上兵馬萬戶各一人。

吾村堡。

在府西二十里。石築。周一千二百九十一尺。

高六尺。甫老知柵。

在府南四十三里。

甫化德柵。

在府南五十四里。○吾村以下俱分兵防戍。

【新增】甫化堡。

在府南五



十四里。石築。城周一千二十三尺。高六尺。芹洞堡。在府北六十七里。土築。城周三百三十八尺。高五尺。

【烽燧】北峰烽燧。

在府北八里。南應長坪。北應姜德。西應魚游澗。

姜德烽燧。

在府北三十七里。南應北峰。北應富寧府崔達洞。

長坪

烽燧。

在府南三十里。南應要站。北應北峰。

要站烽燧。

在府南五十五里。南應朱村南峰。北應長坪。

朱村南峰烽燧。

在府南八

十四里。南應八乙

八乙下烽燧。

在府南一百六十五里。北應南峰。西應尼麼退。

尼麼退烽燧。

在府南一百九十二里。西應

明川件加土。

魚游澗堡烽燧。

在府北三十五里。東應北峰。南應阿陽德。

阿陽德烽燧。

在府北四十里。南應車德生洞中峰。

北應魚游澗西峯。

車德生洞中峰烽燧。

在府北五十四里。南應金得老家下中峰。北應阿陽德。

金得老家下中峰烽燧。

在府西六十八里。西應吾村堡

吾村堡西峰烽燧。

在府西七十一里。東應金得老家下中峯。南應朱乙温堡西峰及山城。

山城

西峰。北應車德生洞中峰。

烽燧。

在府南五里。西應朱乙温堡西峯。北應吾村堡西峰。

朱乙温堡西峰烽燧。

在府西三十三里。北應吾村堡西峰。東應山城。南應同堡南

峯。

朱乙温堡南峰烽燧。

在府南六十五里。南應甫老知堡新烽燧。北應同堡西峰。

甫老知堡新烽燧。

在府西六十七里。



南應同堡及秃烽燧。在府西八十六里。南應甫化德堡  
秃烽燧。及石烽燧。北應甫老知新烽燧。  
北應朱乙温堡南峰。石烽燧。在府西八十九里。  
南應甫化德堡中

山。北應  
甫化德堡中山烽燧。在府西九十一里。南應森森坡  
赤木。北應石烽燧及秃烽燧。森森坡赤木烽燧。在府  
秃烽燧。西一

百二十五里。南應同堡板  
森森坡板烽燧。在府西一百二十七里。南應  
梨坡石烽燧。北應赤木。梨坡石烽燧。在  
烽燧。北應甫化德堡中山。梨坡石烽燧。府

西一百三十六里。南應明川斜个  
洞及圓山。北應森森坡烽燧。[新增] 魚游澗堡李順德烽燧。在府北五十五里。南應  
德。阿陽德。北應富寧林秀

吾村堡南烽燧。在府西四十里。南應朱乙温堡  
西峯。北應車德生洞中峯。朱乙温堡西峰烽燧。在府西四十  
吾村堡南烽燧。南應板烽燧。甫老知堡樺坡烽燧。在府西一百五里。北應  
正德癸酉。革古西峯。移于此。板烽燧。南應石茸峯。石茸峰烽

燧。在府西一百十五里。南  
獨松峰烽燧。在府西一百十里。南應  
應獨松峯。北應樺坡。黃細洞。北應石茸峯。黃細洞烽燧。在府西  
南應寶化堡中嶺  
寶化堡中嶺上烽燧。在府西一百七十里。南應森  
上。北應獨松峯。森坡堡大加退。北應黃細洞。森森坡堡大加

退烽燧。在府西一百五十里。南  
小加退烽燧。在府西一百三十四里。南應姜加德。北  
應小加退。北應中嶺上。應大加退。正德辛巳。革板烽燧。移于

退烽燧。在府西一百五十里。南  
小加退烽燧。在府西一百三十四里。南應姜加德。北  
應小加退。北應中嶺上。應大加退。正德辛巳。革板烽燧。移于

退烽燧。在府西一百五十里。南  
小加退烽燧。在府西一百三十四里。南應姜加德。北  
應小加退。北應中嶺上。應大加退。正德辛巳。革板烽燧。移于



此。姜加德烽燧。在府西一百六十里。南應明川斜个洞李興道代。北應小加退。正德辛巳。革梨坡石。移于此。

【樓亭】威遠樓。在客館東。【新增】南樓。即南門樓。

【學校】鄉校。在府西三里。

【驛院】輸城驛。即龍城之地也。在府北五十里。察訪本道屬驛十八。吾村、朱村、要站、石堡、懷綏、寧安、豐山、櫟山、鍾慶、撫安、鹿野、撫寧、德明、馬乳、燕

基、阿山、江陽、雄撫。○察訪一人。吾村驛。在府南三里。朱村驛。在府南七十九里。有軍倉。要站驛。在府南十二里。【新增】改名永康。

在府南四十六里。清河院。在府北四十里。義生院。在府南六十里。【新增】雲加委院。在府南一百九里。

【佛宇】龍藏寺、萬景菴。俱在雲住山。深跡寺、淨水菴。俱在五峯山。雙溪寺。在白鹿山。中山

寺。在中峯山。龍菴寺。在江陵山。龍梵寺。在雪峯山。

【祠廟】社稷壇。在府西。文廟。在鄉校。城隍祠。在山城。厲壇。在府北。



【古跡】榛坡堡。

在府西一百十里。土築。

甫伊德堡。

在府西一百二十里。土築今廢。

【新增】甌山。

在府南八十七里。土築。

周一千二百七十五尺。內有二池。有倉基。

【名宦】【本朝】崔潤德、河敬復、朴從愚。

俱爲節度使。

李行儉。

爲都鎮撫。朝廷聞都節制使李澄玉有異心。遣

朴好問代之。澄玉殺好問。自稱大金皇帝。將渡江據金舊都。行儉以計留鍾城誅之。特陞僉知中樞院事。

【題詠】新開四鎮置諸軍。

李叔時詩。限帶長江彼我分。云云。將兼經濟能綏撫。歸附多如塞上雲。

鷹揚將帥真無敵。

柳季

聞詩。鐵瓮堅城控海頭。馭戎功業可能收。云云。鼠竊戎夷豈足憂。涉水登山行役役。思親戀主夢悠悠。殊方亦被同仁化。一介書生得意遊。成任詩。途中節候近春分。遮擁前軍復後軍。歌鼓一軒歸意切。云云。

側身南望日邊雲。

吉城縣

東、至明川縣界十里。北、至同縣界三十二里。南、至海岸一百二十七里。西、至端川郡界一百十九里。距京都一千四百六十四里。

【建置沿革】本高句麗舊地。久爲女真所據。高麗睿宗二年。遣尹瓘、吳延寵。



率兵十七萬逐女真。畫定地界。東至火串嶺。北至弓漢嶺。西至蒙羅骨嶺。以爲我疆。於弓漢村。築六百七十間號吉州。三年置防禦使。六年築中城。尋以地還女真。後沒於元。稱海洋。

一云三海洋。龍飛御天歌註。海洋地名。今在吉州。自海洋北行五十里。至泰神。自泰神東行六

十里。至的遏發。海洋、泰神、的遏發三處。各有猛安。其俗謂之三海洋。

恭愍時收復。恭讓二年。置吉州等處管軍民

萬戶府。以英州及宣化等鎮。皆屬于州。本朝

太祖七年。改吉州牧。

世祖十三年。李施愛以州叛。討平之。

睿宗元年。降爲縣。改今名。割州北永平等地。別置明川縣。【官員】縣監、

訓導。各一

【新增】今

上七年。革明川縣來屬。陞爲州置牧使判官。八年還置明川縣。革判官。

【官員】牧使。

一人。

【郡名】海洋。三海洋。

一作陽。

弓漢村。吉州。雄城。



【姓氏】【本縣】崔、李。元。

【山川】圓山。

一名豆里山。在縣西二百九十五里。其東又有小豆里山。

磨天嶺。

在縣西一百三十里。

長白山。

在縣西一百十六里。詳

鏡城府。成佛山。

在縣西四十五里。

刀山。

在縣西四十四里。

長德山。

在縣東五里。

雪峯山。

在縣西七十二里。

海。

在縣

東五十七里。又南一百二十七里。

臨溟川。

在縣南六十二里。源出德萬洞。東流入海。

浮瑞川。

在縣西三里。源出豆里山。與斜下北水合。南流入海。

斜下洞川。

在縣西六里。與浮瑞川合。

榆津。

在縣南七十里。

伐長浦。

在縣南八十二里。

多信浦。

在縣東五十里。即浮瑞川下流。

又東流入海。

雙浦。

在縣南七十八里。詳雙介院註。

火筒洞溫泉。

在縣西九十一里。

藥水里溫泉。

在縣北三十里。

大寺

洞溫泉。

在縣西四十五里。

乾者介洞溫泉。

在縣西十三里。

【土產】絲。麻。鐵。

出多信浦。

麝香。

鹿茸。

羚羊。

五味子。

紫草。

綠礬。

出縣北十

里。

蜂蜜。

人參。

大口魚。

文魚。

鱧魚。

松魚。

黃魚。

銀魚。

古刀魚。

鰻。



蛤。紅蛤。洪魚。麻魚。魴魚。臨淵水魚。紫蟹。蟹。海參。古里麻。藿。

昆布。塔士麻。海獺。水獺。蟾酥。青鼠。貂。樺皮。鹽。[新增]紅花。

白土。出西北。松輦。沙鐵。出西齋洞。在州西四十里。

崔世洞。

【城郭】 邑城。

石築。周四千五百二十六尺。高八尺。內有六井。

【關防】 西北堡。

在縣西六十七里。石築周一千五百四十二尺。高九尺。○兵馬萬戶一人。

斜下北堡。

在縣西四十三里。石築。周九百五十三尺。高四

尺。成宗二十六年。革萬戶置權管。

德萬洞小堡。

在縣西九十一里。木柵周二百四十八尺。高八尺。[新增]正德癸酉。始築石城。周五百尺。高八尺。

梨德

小堡。

在縣北六十二里。板城周五百五十三尺。高七尺。

[新增] 將軍坡堡。

在州北六十六里。石築。城周一千四百六十四尺。高八尺。內有二井。

今上十六年。革梨德堡。移于此。置兵馬萬戶一人。

【烽燧】 鄉校峴烽燧。

在縣南三里。南應山城。北應綠礬帖。西應崔世洞及金萬德。

綠礬帖烽燧。

在縣北十二里。北應明川縣古帖峴。



西應同縣立巖。

山城烽燧。

在縣南二十八里。北應鄉校峴。南應榆津。

榆津烽燧。

南應伐長浦。北應山城。

伐長浦

烽燧。

南應端川郡胡打里。北應榆津。

崔世洞烽燧。

在縣西二十六里。東應鄉校峴。西應獐項。

獐項烽燧。

在縣西四十九里。東應崔世

洞。北應

玉泉洞烽燧。

在縣西六十八里。西應大洞。南應獐項。

大洞烽燧。

在縣西八十七里。東應玉泉洞。

金萬德烽

燧。

在縣西三十四里。東應鄉校峴。西應防墻。

防墻烽燧。

在縣西四十七里。東應金萬德。

【新增】西山烽燧。

在州北七十里。北

應明川起雲峯。

長古介中峯烽燧。

在州北五十六里。西應西山。南應崔世洞。

烏曷巖烽燧。

在州西七十二里。西應大洞。

東應中峯。

南應獐項。今上十一年。

鷹峯烽燧。

在州西一百三十里。北應榆德。南應西山中峯。西應端川栢德。

西山中峯烽燧。

在州西一百二里。北

榆德烽燧。

在州西六十五里。西應西山中峰。東應鄉校峴。

場洞烽燧。

在州南六十里。北應山城。南應歧伊

應鷹峰。東應榆德。

里洞。弘治己未。革

歧伊里洞烽燧。

在州南九十五里。北應場洞。南應端川胡打里。今上七年。革伐長浦烽燧。移于此。

榆津烽燧。移于此。

【樓亭】壓海亭。

在海岸上。【新增】今移構磨天嶺上。